

D.R. 11/2015

RANG UNDANG-UNDANG

b e r n a m a

Suatu Akta untuk meminda Akta Bekalan Elektrik 1990.

[]

DIPERBUAT oleh Parlimen Malaysia seperti yang berikut:

Tajuk ringkas, permulaan kuat kuasa dan pemakaian

1. (1) Akta ini bolehlah dinamakan Akta Bekalan Elektrik (Pindaan) 2015.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*, dan Menteri boleh menetapkan tarikh yang berlainan bagi permulaan kuat kuasa Akta ini di bahagian-bahagian yang berlainan di Malaysia.

(3) Akta ini hendaklah terpakai di seluruh Malaysia; walau bagaimanapun Menteri boleh, melalui perintah, menggantung penguatkuasaan keseluruhan atau mana-mana peruntukan Akta ini di mana-mana Negeri.

Pindaan am

2. Akta Bekalan Elektrik 1990 [*Akta 447*], yang disebut “Akta ibu” dalam Akta ini, dipinda dengan menggantikan perkataan “adalah melakukan” di mana-mana jua terdapat dengan perkataan “melakukan”.

Pindaan seksyen 2**3. Seksyen 2 Akta ibu dipinda—**

(a) dengan memasukkan selepas takrif “elektrik” takrif yang berikut:

‘ “faktor kuasa” ertinya nisbah kuasa aktif pada kuasa ketara;’;

(b) dengan memasukkan selepas takrif “hidup” atau “bertenaga” takrif yang berikut:

‘ “ infrastruktur bekalan elektrik” ertinya—

(a) stesen jana kuasa;

(b) talian bekalan utama dan talian bekalan;

(c) pencawang bagi penukaran, pengubahan atau pengawalan elektrik;

(d) kelengkapan bagi pemeteran, pemantauan atau pengawalan elektrik; dan

(e) apa-apa dawai, kelengkapan dan laluan termasuk terowong dan lubang atau lain-lain yang digunakan bagi, atau berkaitan dengan, penjanakuasaan, penghantaran, pengagihan atau pembekalan elektrik,

pemegang lesen;’;

(c) dengan memasukkan selepas takrif “jana kuasa” takrif yang berikut:

‘ “jualan” ertinya aktiviti membekal dan menjual elektrik kepada pengguna akhir;’;

(d) dalam takrif “kelengkapan”—

(i) dengan memotong koma selepas perkataan “tenaga”;

- (ii) dengan memasukkan selepas perkataan “tenaga” perkataan “atau komunikasi”; dan
 - (iii) dengan memasukkan selepas perkataan “aksesori” perkataan “, produk elektrik, kelengkapan elektrik pengguna”;
- (e) dengan memasukkan selepas takrif “kelengkapan” takrif yang berikut:

‘ “kelengkapan elektrik pengguna” ertinya suatu perkakas, produk, dawai, peranti, aksesori atau apa-apa bahagiannya, yang menggunakan elektrik bervoltan rendah yang—

(a) dijual kepada orang awam; atau

(b) tidak memerlukan kemahiran khusus dalam pengendaliannya;’;

- (f) dengan memasukkan selepas takrif “kelengkapan elektrik pengguna” takrif yang berikut:

‘ “kerja elektrik” ertinya apa-apa kerja yang dilaksanakan atau yang dijalankan pada suatu pemasangan elektrik dan termasuklah pemasangan, pembinaan, pendirian atau pembaikan, pengubahan struktur, penggantian mana-mana bahagiannya, penambahan apa-apa bahagian padanya atau perjalanan apa-apa kerja bagi maksud penyenggaraannya, tetapi tidak termasuk kerja berhubung dengan—

(a) pengilangan suatu pemasangan elektrik atau pemasangan dalam proses, atau berkaitan dengan, pengilangannya bagi maksud menghasilkan barang baru; atau

(b) peminyakan, penggrisan, pembersihan atau pengecatan suatu pemasangan elektrik;’;

- (g) dengan memasukkan selepas takrif “keselamatan diri” takrif yang berikut:

‘ “Ketua Pegawai Eksekutif” ertinya Ketua Pegawai Eksekutif Suruhanjaya;’;

- (h) dengan memasukkan selepas takrif “Ketua Pegawai Eksekutif” takrif yang berikut:

‘ “komunikasi” mempunyai erti yang diberikan kepadanya di bawah Akta Komunikasi dan Multimedia 1998 [*Akta 588*];’;

- (i) dengan memasukkan selepas takrif “konduktor” takrif yang berikut:

‘ “kualiti kuasa” ertinya ciri-ciri elektrik pada titik yang diberikan pada suatu sistem elektrik, yang dinilai dengan membandingkannya dengan suatu set parameter rujukan teknikal seperti magnitud voltan dan arus, frekuensi atau bentuk gelombang;’;

- (j) dengan memasukkan selepas takrif “mati” takrif yang berikut:

‘ “mengasingkan” ertinya mengenal pasti dan memencilkan aktiviti, aset, kos, hasil dan obligasi perkhidmatan Pengendali Sistem atau Pembeli Tunggal daripada pemegang lesen yang disebut masing-masing dalam seksyen 22A dan 22B melalui pemisahan perakaunan, kewangan atau perundangan atau cara lain sebagaimana yang ditentukan oleh Suruhanjaya untuk memastikan pengurusan Pengendali Sistem atau Pembeli Tunggal boleh bertindak secara bebas daripada aktiviti di bawah lesen pemegang lesen dan untuk memudahkan persaingan yang berkesan dan meningkatkan ketelusan dalam pengendalian sistem kuasa;’;

- (k) dengan memasukkan selepas takrif “Menteri” takrif yang berikut:

‘ “meter” ertinya apa-apa perkakas, alat, kelengkapan atau peranti yang digunakan bagi maksud mengukur dan merekodkan jumlah tenaga elektrik atau permintaan maksimum atau faktor kuasa atau mana-mana gabungannya;’;

- (l) dengan memasukkan selepas takrif “pegawai diberi kuasa” takrif yang berikut:

‘ “Pembeli Tunggal” ertinya mana-mana orang atau sesuatu unit, jabatan atau bahagian yang membentuk sebahagian daripada pemegang lesen yang diberi kuasa di bawah subseksyen 22B(1) bertanggungjawab bagi

pengurusan pemerolehan elektrik dan perkhidmatan yang berkaitan, yang termasuklah perancangan, penjadualan, pemerolehan dan penyelesaian, dan apa-apa fungsi lain sebagaimana yang ditetapkan;’;

- (m) dengan memasukkan selepas takrif “penebat” takrif yang berikut:

‘ “Pengendali Sistem” ertinya mana-mana orang atau sesuatu unit, jabatan atau bahagian yang membentuk sebahagian daripada pemegang lesen yang diberi kuasa di bawah subseksyen 22A(1) bertanggungjawab bagi jaminan sistem, perancangan pengendalian, penghantaran unit jana kuasa, pengendalian masa nyata dan pengawalan sistem kuasa dan apa-apa fungsi lain sebagaimana yang ditetapkan;’;

- (n) dalam takrif “pepasangan”, dengan memasukkan selepas perkataan “talian bekalan” perkataan “, infrastruktur bekalan elektrik, pemasangan elektrik domestik dan bukan domestik”;

- (o) dengan memasukkan selepas takrif “pihak pengurusan” takrif yang berikut:

‘ “produk elektrik” ertinya apa-apa kelengkapan, peranti atau perkakas selain kelengkapan elektrik pengguna;’;

- (p) dengan memasukkan selepas takrif “produk elektrik” takrif yang berikut:

‘ “rangkaian pengagihan elektrik” ertinya sesuatu sistem atau sebahagian daripada sesuatu sistem pada voltan nominal di bawah 66 kilovolt pada talian atau kabel elektrik, pencawang dan kelengkapan dan bangunan yang berkaitan bagi pengagihan elektrik tanpa mengira sama ada loji jana kuasa bersambung dengan sistem itu;’;

- (q) dengan memasukkan selepas takrif “rangkaian pengagihan elektrik” takrif yang berikut:

‘ “rangkaian penghantaran elektrik” ertinya sesuatu sistem atau sebahagian daripada sesuatu sistem pada voltan nominal 66 kilovolt dan ke atas pada talian

bekalan utama atau kabel, pencawang dan kelengkapan dan bangunan yang berkaitan yang digunakan bagi menyalurkan elektrik—

- (a) dari suatu stesen jana kuasa ke suatu pencawang;
 - (b) dari satu stesen jana kuasa ke stesen jana kuasa yang lain;
 - (c) dari satu pencawang ke pencawang yang lain;
 - (d) ke atau dari mana-mana titik saling hubungan; atau
 - (e) ke pengguna akhir;’;
- (r) dengan memasukkan selepas takrif “sistem” takrif yang berikut:
- ‘ “sistem kuasa” ertinya sesuatu sistem gabungan yang terdiri daripada suatu rangkaian penghantaran elektrik, rangkaian pengagihan elektrik dan stesen jana kuasa yang bersambung dengan rangkaian penghantaran elektrik itu dan termasuklah sebahagian daripada sistem itu;’;
- (s) dengan memotong takrif “voltan amat tinggi”; dan
 - (t) dengan memotong takrif “voltan tinggi”.

Pindaan seksyen 4

4. Seksyen 4 Akta ibu dipinda—

- (a) dalam perenggan (b), dengan memasukkan selepas perkataan “menentukan” perkataan “standard pembekalan dan perkhidmatan,”;
- (b) dalam perenggan (d)—
 - (i) dengan menggantikan perkataan “untuk memajukan kepentingan pengguna elektrik yang dibekalkan oleh pemegang lesen berkenaan dengan—” dengan perkataan “untuk menjalankan fungsi pengawalseliaan berkenaan dengan kepentingan pengguna dan penguatkuasaan berkenaan dengan—”;

- (ii) dalam subperenggan (ii), dengan memotong perkataan “dan” di hujung subperenggan itu;
- (iii) dalam subperenggan (iii), dengan memasukkan perkataan “dan” di hujung subperenggan itu; dan
- (iv) dengan memasukkan selepas subperenggan (iii) subperenggan yang berikut:
 - “(iv) kualiti bekalan elektrik yang termasuklah kebolehpercayaan dan kualiti kuasa;”;
- (c) dengan memasukkan selepas perenggan (e) perenggan yang berikut:
 - “(ea) untuk mengawal selia aktiviti pemegang lesen supaya semua permintaan yang munasabah bagi elektrik dipenuhi;”;
- (d) dalam perenggan (f) dalam teks bahasa Inggeris, dengan menggantikan perkataan “secure” dengan perkataan “ensure”;
- (e) dengan memasukkan selepas perenggan (g) perenggan yang berikut:
 - “(ga) untuk menggalakkan pembangunan dan penyenggaraan sistem yang selamat dan berkesan bagi penjanakuasaan, penghantaran, pengagihan dan pembekalan elektrik kepada pengguna dan penambahbaikan kehendak keselamatan yang berterusan;
 - (gb) untuk menguatkuasakan standard bagi pemasangan elektrik dan infrastruktur bekalan elektrik pemegang lesen, produk elektrik dan kelengkapan elektrik pengguna;”;
- (f) dengan menggantikan perenggan (k) dengan perenggan yang berikut:
 - “(k) untuk mengadakan peruntukan, jika perlu, bagi pendaftaran apa-apa pemasangan, orang yang memberikan perkhidmatan yang berhubungan dengan penggunaan elektrik dengan cekap, unit

pendawaian persendirian, kontraktor elektrik, kontraktor perkhidmatan elektrik, kontraktor pembaikan elektrik, pengilang dan pengimport, pusat atau institusi latihan dan peperiksaan, badan penilaian pematuhan dan mana-mana orang yang kompeten, sebagaimana yang ditetapkan;”;

(g) dalam perenggan (la), dengan memotong perkataan “dan” di hujung perenggan itu; dan

(h) dengan memasukkan selepas perenggan (la) perenggan yang berikut:

“(lb) untuk mengkaji semula atau mengaudit apa-apa maklumat yang dikehendaki untuk diberikan oleh pemegang lesen kepada Suruhanjaya;

(lc) untuk mengaudit atau menyebabkan supaya diaudit aktiviti mana-mana pemegang lesen atau mana-mana orang yang ditentukan oleh Suruhanjaya; dan”.

Penggantian seksyen 4A

5. Akta ibu dipinda dengan menggantikan seksyen 4A dengan seksyen yang berikut:

“Pegawai diberi kuasa

4A. (1) Menteri boleh secara bertulis memberi mana-mana pegawai awam atau pegawai Suruhanjaya kuasa untuk menjalankan kuasa penguatkuasaan di bawah Akta ini.

(2) Mana-mana pegawai itu hendaklah disifatkan sebagai pekhidmat awam mengikut pengertian Kanun Keseksaan [Akta 574].

(3) Dalam menjalankan mana-mana kuasa penguatkuasaan di bawah Akta ini, seseorang pegawai diberi kuasa hendaklah, apabila diminta, mengemukakan kepada orang yang terhadapnya dia bertindak kuasa yang dikeluarkan kepadanya oleh Menteri.”.

Seksyen baru 5A dan 5B

6. Akta ibu dipinda dengan memasukkan selepas seksyen 5 seksyen yang berikut:

“Kos memegang benda yang disita

5A. Jika apa-apa kelengkapan, alat, bahan, buku, rekod, akaun, dokumen, barang atau benda yang disita di bawah Akta ini atau perundangan subsidiarinya dipegang dalam jagaan Kerajaan atau Suruhanjaya sementara menunggu penyelesaian apa-apa prosiding berkenaan dengan suatu kesalahan di bawah Akta ini atau perundangan subsidiarinya, kos bagi memegang kelengkapan, alat, bahan, buku, rekod, akaun, dokumen, barang atau benda itu dalam jagaan hendaklah, sekiranya mana-mana orang didapati telah melakukan suatu kesalahan, menjadi hutang yang kena dibayar kepada Kerajaan atau Suruhanjaya, mengikut mana-mana yang berkenaan, oleh orang itu dan hendaklah didapatkan dengan sewajarnya.

Pelepasan benda yang disita

5B. (1) Jika apa-apa kelengkapan, alat, bahan, buku, rekod, akaun, dokumen, barang atau benda telah disita di bawah Akta ini, pegawai diberi kuasa yang membuat penyitaan itu boleh, pada bila-bila masa selepas itu, dengan keizinan Pendakwa Raya, melepaskan kelengkapan, alat, bahan, buku, rekod, akaun, dokumen, barang atau benda itu kepada orang yang diputuskan olehnya sebagai berhak secara sah kepada kelengkapan, alat, bahan, buku, rekod, akaun, dokumen, barang atau benda itu jika dia berpuas hati bahawa kelengkapan, alat, bahan, buku, rekod, akaun, dokumen, barang atau benda itu tidak dikehendaki selainnya bagi maksud apa-apa prosiding di bawah Akta ini atau perundangan subsidiarinya, atau bagi maksud apa-apa pendakwaan di bawah mana-mana undang-undang bertulis yang lain, dan dalam hal ini, pegawai yang membuat penyitaan itu atau Kerajaan, Suruhanjaya atau mana-mana orang yang bertindak bagi pihak Kerajaan atau Suruhanjaya tidak boleh bertanggung bagi apa-apa prosiding oleh mana-mana orang jika penyitaan dan pelepasan kelengkapan, alat, bahan, buku, rekod, akaun, dokumen, barang atau benda itu telah dibuat dengan suci hati.

(2) Suatu rekod secara bertulis hendaklah dibuat oleh pegawai diberi kuasa yang membuat pelepasan apa-apa benda di bawah subseksyen (1) yang menyatakan secara terperinci hal keadaan dan sebab bagi pelepasan itu dan menghantar salinan rekod itu kepada Pendakwa Raya.”.

Pindaan seksyen 7

7. Akta ibu dipinda dengan memotong seksyen 7.

Pindaan seksyen 8

8. Seksyen 8 Akta ibu dipinda—

(a) dengan memotong perkataan “atau” di hujung perenggan (c);

(b) dengan memasukkan selepas perenggan (c) perenggan yang berikut:

“(ca) enggan untuk memberi mana-mana pegawai Suruhanjaya apa-apa maklumat yang dengan munasabahnya mungkin dikehendaki daripadanya dan yang ada dalam pengetahuannya atau yang dia mempunyai kuasa untuk memberikan berhubung dengan apa-apa perkara di bawah fungsi, tugas dan kuasa Suruhanjaya di bawah seksyen 4; atau”;

(c) dengan menggantikan perkataan “lima ribu” dengan perkataan “lima puluh ribu”; dan

(d) dengan menggantikan perkataan “dua tahun” dengan perkataan “tiga tahun”.

Pindaan seksyen 9

9. Seksyen 9 Akta ibu dipinda—

(a) dalam subseksyen (1)—

(i) dengan menggantikan perkataan “Tertakluk kepada apa-apa pengecualian yang” dengan perkataan “Tertakluk kepada apa-apa pengecualian yang diberikan di bawah Akta ini”; dan

- (ii) dalam teks bahasa kebangsaan, dengan menggantikan perkataan “mengikut terma sesuatu lesen yang membenarkan dengan nyata” dengan perkataan “mengikut terma dan syarat sesuatu lesen sebagaimana yang ditetapkan yang membenarkan”;
 - (b) dalam subseksyen (2), dengan memasukkan sebelum perkataan “syarat” perkataan “terma dan”;
 - (c) dengan memasukkan selepas subseksyen (2A) subseksyen yang berikut:
 - “(2B) Walau apa pun subseksyen (2), Suruhanjaya boleh memberikan suatu lesen apabila fi dibayar dan atas apa-apa syarat sebagaimana yang ternyata dikehendaki atau suai manfaat memandangkan tugas yang dikenakan oleh seksyen 4 berkenaan dengan apa-apa pemasangan yang ditetapkan.
 - (2C) Suruhanjaya boleh, dari semasa ke semasa, mengeluarkan kod, garis panduan atau arahan berkenaan dengan apa-apa pemasangan.”; dan
 - (d) dengan memasukkan selepas subseksyen (6) subseksyen yang berikut:
 - “(7) Suruhanjaya boleh, dengan kelulusan Menteri, pada bila-bila masa—
 - (a) mengenakan apa-apa terma atau syarat tambahan ke atas lesen, termasuk lesen sedia ada; atau
 - (b) meminda apa-apa terma atau syarat yang dikenakan ke atas lesen itu,
- mengikut tatacara sebagaimana yang boleh ditetapkan.”.

Seksyen baru 9A, 9B, 9C, 9D dan 9E

10. Akta ibu dipinda dengan memasukkan selepas seksyen 9 seksyen yang berikut:

“Obligasi untuk mengemukakan pelan perniagaan

9A. (1) Suruhanjaya boleh meminta mana-mana pemegang lesen untuk mengemukakan rancangan perniagaan boleh pinda lima tahun, atau apa-apa tempoh lain sebagaimana yang ditentukan oleh Suruhanjaya, yang dikemaskinikan atas

asas tahunan atau apa-apa tempoh masa lain sebagaimana yang ditentukan oleh Suruhanjaya mengikut tatacara yang diperuntukkan dalam garis panduan yang dikeluarkan oleh Suruhanjaya.

(2) Mana-mana pemegang lesen yang melanggar seksyen ini melakukan suatu kesalahan.

Kehendak bagi pelesenan

9B. (1) Walau apa pun mana-mana peruntukan lain Akta ini, jika pada bila-bila masa ternyata pada Suruhanjaya bahawa seorang pemegang lesen tidak mematuhi apa-apa kehendak atau memenuhi apa-apa kewajipan atau obligasinya di bawah Akta ini atau perundangan subsidiarinya atau syarat lesen, Suruhanjaya boleh menghendaki pemegang lesen itu untuk membetulkan ketidakpatuhan itu atau untuk mematuhi kehendak, kewajipan atau obligasi atau syarat lesen itu dalam tempoh yang dinyatakan.

(2) Pemegang lesen yang disebut dalam subseksyen (1) hendaklah mengambil segala langkah yang munasabah untuk mematuhi dan mengemukakan laporan pematuhan berkala tentang langkah yang diambil sehingga memuaskan hati Suruhanjaya.

(3) Mana-mana pemegang lesen yang melanggar seksyen ini melakukan suatu kesalahan.

Standard prestasi pembekalan dan perkhidmatan oleh pemegang lesen

9C. (1) Suruhanjaya boleh, dari semasa ke semasa, mengeluarkan kod, garis panduan atau arahan mengenai apa-apa standard prestasi pembekalan dan perkhidmatan untuk dilaksanakan oleh pemegang lesen termasuk tatacara bagi—

- (a) memenuhi dengan munasabah kehendak pengguna;
- (b) pengendalian aduan dan pertikaian pengguna;
- (c) tatacara bagi pampasan pengguna dalam hal pelanggaran standard prestasi atau pelanggaran mana-mana obligasi pemegang lesen di bawah Akta; dan
- (d) perlindungan maklumat pengguna.

(2) Apa-apa tindakan yang diambil oleh Suruhanjaya menurut seksyen ini berkenaan dengan apa-apa kegagalan oleh mana-mana pemegang lesen untuk memenuhi standard yang disebut dalam subseksyen (1), tidak boleh menjejaskan atau menyentuh apa-apa remedi lain yang mungkin ada berkenaan dengan tindakan atau peninggalan oleh pemegang lesen yang menjadi kegagalan itu di bawah mana-mana undang-undang lain, termasuk Akta Perlindungan Pengguna 1999 [*Akta 599*].

(3) Suruhanjaya boleh mengarahkan pemegang lesen untuk menyediakan apa-apa maklumat tentang tahap prestasi yang dicapai dan perkhidmatan yang disediakan berkenaan dengan standard yang disebut dalam subseksyen (1) kepada pengguna atau bakal pengguna.

(4) Pemegang lesen hendaklah menyiarkan standard perkhidmatan penggunaannya sendiri mengikut kod, garis panduan atau arahan yang disebut dalam subseksyen (1).

(5) Mana-mana pemegang lesen yang melanggar seksyen ini melakukan suatu kesalahan.

Akaun tahunan yang sepatutnya oleh pemegang lesen

9D. (1) Pemegang lesen hendaklah menyimpan dan menyenggara akaun aktiviti tahunan yang sepatutnya di bawah lesen yang mengandungi butir-butir yang mencukupi sebagaimana yang dikehendaki mengenai apa-apa hasil, kos, aset, liabiliti, rizab atau apa-apa perkara lain yang berkaitan.

(2) Akaun itu hendaklah juga mengikut apa-apa garis panduan atau arahan sebagaimana yang dikeluarkan oleh Suruhanjaya, dari semasa ke semasa kepada pemegang lesen dan akaun itu hendaklah dikemukakan kepada Suruhanjaya dengan sewajarnya.

Perkiraan bagi perolehan elektrik

9E. Dalam menjalankan fungsinya di bawah perenggan 4(*d*), apa-apa perkiraan oleh pemegang lesen atau Pembeli Tunggal bagi perolehan elektrik melalui rangkaian penghantaran elektrik, hendaklah tertakluk kepada kelulusan Suruhanjaya.”

Pindaan seksyen 12

11. Seksyen 12 Akta ibu dipinda dengan menggantikan subseksyen (1) dengan subseksyen yang berikut:

“(1) Tertakluk kepada kelulusan Pihak Berkuasa Negeri dan atas apa-apa syarat sebagaimana yang disifatkan wajar oleh Pihak Berkuasa Negeri, sesuatu lesen boleh meliputi untuk membenarkan pemegang lesen meletakkan, menempatkan atau membawa, di atas, di bawah atau melewati tanah Negeri, talian bekalan itu dan mendirikan dan menyenggarakan di dalam atau di atas tanah Negeri apa-apa tiang dan kelengkapan lain sebagaimana yang didapati perlu atau patut oleh Suruhanjaya bagi maksud pemasangan berlesen.”.

Pindaan seksyen 17

12. Seksyen 17 Akta ibu dipinda dengan memasukkan selepas subseksyen (3) subseksyen yang berikut:

“(4) Tanpa menjejaskan subseksyen (3), pemegang lesen hendaklah membetulkan dan membaiki apa-apa kerosakan untuk memastikan keberterusan pembekalan elektrik dan, jika berkenaan, membayar pampasan bagi apa-apa kerosakan dalam tempoh sebagaimana yang diarahkan oleh Suruhanjaya jika ditunjukkan bahawa kerosakan itu adalah akibat daripada kecuaiannya pemegang lesen, ejen atau pekerjanya, mengikut mana-mana yang berkenaan.”.

Pindaan seksyen 21

13. Seksyen 21 Akta ibu dipinda—

(a) dengan menggantikan subseksyen (1) dengan subseksyen yang berikut:

“(1) Sebelum siapnya sesuatu pemasangan baru, selain pemasangan yang dipunyai oleh pihak berkuasa bekalan atau pemasangan yang dikendalikan atau dipunyai oleh pemegang lesen, pemunya pemasangan hendaklah mengemukakan, dengan pendua, kepada Suruhanjaya, suatu permohonan bagi pendaftaran dalam bentuk yang ditetapkan.

(1A) Suruhanjaya hendaklah menyebabkan pemeriksaan dan ujian dibuat dalam tempoh yang ditetapkan dan, jika pemasangan itu memuaskan kehendak Akta ini, hendaklah mengeluarkan atau menyebabkan supaya dikeluarkan Perakuan Pendaftaran dalam bentuk yang ditetapkan.”; dan

(b) dalam subseksyen (2), dengan memasukkan selepas perkataan “pemasangan,” perkataan “selain suatu pemasangan yang dikecualikan di bawah subseksyen (1)”.

Seksyen baru 22A dan 22B

14. Akta ibu dipinda dengan memasukkan selepas seksyen 22 seksyen yang berikut:

“Pengendali Sistem

22A. (1) Menteri boleh, atas syor Suruhanjaya, memberi kuasa atau membatalkan pemberian kuasa mana-mana orang atau sesuatu unit, jabatan atau bahagian yang menjadi sebahagian daripada pemegang lesen untuk menjadi Pengendali Sistem melalui perintah yang disiarkan dalam *Warta*.

(2) Pengendali Sistem hendaklah mematuhi apa-apa peraturan, kod, garis panduan atau arahan berkaitan dengan fungsinya sebagaimana yang dikeluarkan oleh Menteri atau Suruhanjaya, mengikut mana-mana yang berkenaan, di bawah Akta ini.

(3) Pengendali Sistem, semasa menunaikan fungsinya di bawah Akta ini, hendaklah memastikan kelakuan tidak berdiskriminasi dan pengendalian optimum sistem kuasa itu setakat yang ia tidak menjejaskan kebolehpercayaan, keterjaminan dan keselamatan sistem kuasa itu.

(4) Suruhanjaya boleh, dari semasa ke semasa, mengeluarkan kod, garis panduan atau arahan untuk mengasingkan Pengendali Sistem daripada aktiviti di bawah lesen pemegang lesen itu yang tidak berkaitan dengan fungsinya sebagai Pengendali Sistem.

Pembeli Tunggal

22B. (1) Menteri boleh, atas syor Suruhanjaya, memberi kuasa atau membatalkan pemberian kuasa mana-mana orang atau

sesuatu unit, jabatan atau bahagian yang menjadi sebahagian daripada pemegang lesen untuk menjadi Pembeli Tunggal melalui perintah yang disiarkan dalam *Warta*.

(2) Pembeli Tunggal hendaklah mematuhi apa-apa peraturan, kod, garis panduan atau arahan berkaitan dengan fungsinya sebagaimana yang dikeluarkan oleh Menteri atau Suruhanjaya, mengikut mana-mana yang berkenaan, di bawah Akta ini.

(3) Pembeli Tunggal, semasa menunaikan fungsinya di bawah Akta ini, hendaklah memastikan kelakuan tidak berdiskriminasi dan pengendalian optimum sistem kuasa itu setakat yang ia tidak menjejaskan kebolehpercayaan, keterjaminan dan keselamatan sistem kuasa itu.

(4) Suruhanjaya boleh, dari semasa ke semasa, mengeluarkan kod, garis panduan atau arahan untuk mengasingkan Pembeli Tunggal daripada aktiviti di bawah lesen pemegang lesen itu yang tidak berkaitan dengan fungsinya sebagai Pembeli Tunggal.”.

Seksyen baru 23d

15. Akta ibu dipinda dengan memasukkan selepas seksyen 23c seksyen yang berikut:

“Pendaftaran orang yang memberikan perkhidmatan yang berhubungan dengan penggunaan elektrik dengan cekap

23d. Tiada seorang pun boleh memberikan apa-apa perkhidmatan yang berhubungan dengan penggunaan elektrik dengan cekap melainkan berdaftar di bawah Akta ini.”.

Pindaan seksyen 24

16. Seksyen 24 Akta ibu dipinda dengan memasukkan selepas subseksyen (5) subseksyen yang berikut:

“(6) Mana-mana orang yang dengan menyalahi undang-undang—

(a) menghalang, mencegah atau menggagalkan pembekalan elektrik daripada diberikan oleh pemegang lesen kepada pengguna;

- (b) menghalang, mencegah atau menggalang pembekalan elektrik kepada mana-mana pengguna daripada dipotong oleh pemegang lesen mengikut Akta ini; atau
- (c) menyebabkan pembekalan elektrik kepada mana-mana pengguna dipotong,

melakukan suatu kesalahan dan boleh, apabila disabitkan, didenda tidak melebihi satu ratus ribu ringgit atau dipenjarakan selama tempoh tidak melebihi tiga tahun atau kedua-duanya.”.

Pindaan seksyen 25

17. Seksyen 25 Akta ibu dipinda—

- (a) dengan memasukkan selepas perenggan (a) perenggan yang berikut:

“(aa) premis itu, iaitu suatu premis komersial atau perindustrian—

- (i) terletak di atas tanah tanpa mendapat keizinan pemilik tanah;
- (ii) tidak diluluskan menurut atau melanggar peruntukan Akta Kerajaan Tempatan 1976 [*Akta 171*] dan Akta Perancangan Bandar dan Desa 1976 [*Akta 172*]; atau
- (iii) bertentangan dengan mana-mana undang-undang bertulis yang lain; dan

- (b) dengan menggantikan perenggan (b) dengan perenggan yang berikut:

“(b) dia terhalang daripada melakukan sedemikian oleh kerosakan atau kegagalan apa-apa infrastruktur bekalan elektrik, sistem elektrik, kelengkapan atau pemasangan yang di luar kawalannya, atau akibat daripada kebakaran, banjir, tanah runtuh, letupan, kemalangan, kekacauan perindustrian di peringkat negara, darurat, rusuhan, kekacauan awam atau peperangan, atau apa-apa kejadian serupa yang lain yang bukan dalam kawalan pemegang lesen.”.

Penggantian seksyen 26

18. Akta ibu dipinda dengan menggantikan seksyen 26 dengan seksyen yang berikut:

“Kuasa untuk menetapkan tarif dan caj

26. (1) Suruhanjaya boleh menentukan tarif dan caj untuk dilevikan, dengan kelulusan Menteri, oleh seseorang pemegang lesen.

(2) Suruhanjaya boleh, dari semasa ke semasa, mengeluarkan garis panduan mengenai tarif dan caj termasuk—

- (a) perkaedahan, prinsip, kategori dan reka bentuk tarif dan caj;
- (b) tempoh bagi penganan tarif dan caj dan bagi kajian semula tarif dan caj; dan
- (c) pengemukaan apa-apa maklumat sebagaimana yang dikehendaki dan difikirkan perlu oleh Suruhanjaya.

(3) Pemegang lesen hendaklah mengemukakan suatu cadangan mengenai tarif dan caj kepada Suruhanjaya mengikut garis panduan yang dikeluarkan oleh Suruhanjaya di bawah subseksyen (2).

(4) Tarif dan caj yang diluluskan hendaklah disiarkan oleh pemegang lesen mengikut apa-apa cara sebagaimana yang Suruhanjaya berpendapat dapat memastikan publisiti yang mencukupi bagi tarif itu.

(5) Tarif dan caj yang diluluskan di bawah subseksyen (1) boleh termasuk tetapi tidak terhad kepada—

- (a) suatu caj tetap sebagai tambahan kepada caj bagi elektrik yang sebenarnya dibekalkan;
- (b) suatu caj berkenaan dengan ketersediaan bekalan elektrik dan caj itu boleh berubah mengikut takat pembekalan;
- (c) suatu caj sewa atau caj lain berkenaan dengan mana-mana meter elektrik atau loji atau kelengkapan elektrik yang disediakan oleh pemegang lesen;

(d) suatu kadar atau kuantum diskaun atau premium daripada tarif yang diluluskan berkenaan dengan jenis pengguna tertentu atau maksud awam sebagaimana yang ditentukan oleh Menteri; dan

(e) suatu kadar atau kuantum bayaran, caj atau levi bagi apa-apa jumlah wang menurut mana-mana undang-undang bertulis yang lain atau mana-mana garis panduan yang dikeluarkan oleh Suruhanjaya.

(6) Dalam melewikan tarif dan caj menurut subseksyen (1) dan dalam membuat perjanjian khas di bawah seksyen 29, seseorang pemegang lesen tidak boleh menunjukkan keutamaan tidak wajar atau diskriminasi di kalangan pengguna atau orang yang berada di tempat yang sama dengan mengambil kira tempat dan masa pembekalan, kuantiti elektrik yang dibekalkan, beban pengguna dan faktor kuasa, dan maksud yang baginya bekalan itu diambil.”.

Pindaan seksyen 27

19. Subseksyen 27(1) Akta ibu dipinda dengan memasukkan selepas perkataan “dilakukan dengan munasabah” perkataan “sebagaimana yang ditentukan oleh Suruhanjaya”.

Seksyen baru 28B

20. Akta ibu dipinda dengan memasukkan selepas seksyen 28A seksyen yang berikut:

“Perjanjian pembekalan dengan pengguna

28B. (1) Seseorang yang memohon pembekalan elektrik daripada seseorang pemegang lesen selepas tarikh permulaan kuat kuasa Akta ini hendaklah membuat suatu perjanjian dengan pemegang lesen itu bagi pembekalan elektrik atas terma dan syarat sebagaimana yang dinyatakan dalam perjanjian itu sebelum elektrik dibekalkan.

(2) Suatu perjanjian yang disebut dalam subseksyen (1) hendaklah dalam bentuk dan dengan kandungan sebagaimana yang diluluskan oleh Suruhanjaya.”.

Pindaan seksyen 29**21. Seksyen 29 Akta ibu dipinda—**

- (a) dalam subseksyen (1), dengan memasukkan selepas perkataan “seseorang” perkataan “atau seseorang pemegang lesen”; dan
- (b) dengan memasukkan selepas subseksyen (3) subseksyen yang berikut:

“(4) Apa-apa perjanjian yang dibuat antara pemegang lesen di bawah subseksyen (1) hendaklah diluluskan oleh Suruhanjaya.”.

Pindaan seksyen 30**22. Seksyen 30 Akta ibu dipinda—**

- (a) dengan menggantikan subseksyen (1) dan (2) dengan subseksyen yang berikut:

“(1) Sesuatu pertikaian antara dua orang atau lebih berkenaan dengan apa-apa perkara di bawah seksyen 9E, 17, 24 hingga 29 dan 32 hendaklah terlebih dahulu cuba diselesaikan melalui perundingan antara pihak-pihak kepada pertikaian itu.

(2) Jika pihak-pihak kepada pertikaian itu tidak dapat atau selainnya tidak mencapai suatu persetujuan untuk menyelesaikan pertikaian itu, pihak-pihak itu boleh mencari penyelesaian pertikaian itu melalui suatu jawatankuasa yang ditubuhkan oleh Suruhanjaya untuk mendengar dan menyelesaikan pertikaian:

Dengan syarat bahawa dalam hal yang difikirkan patut oleh Suruhanjaya, pertikaian itu boleh ditentukan melalui timbang tara di bawah seksyen 36.”;

- (b) dalam subseksyen (4)—

- (i) dengan memasukkan selepas perkataan “seksyen” perkataan “9E, 17,”; dan
 - (ii) dengan memasukkan selepas perkataan “29” perkataan “dan 32”; dan
- (c) dalam subseksyen (5), dengan memotong perkataan “atau penimbang tara, mengikut mana-mana yang berkenaan,”.

Seksyen baru 30A dan 30B

23. Akta ibu dipinda dengan memasukkan selepas seksyen 30 seksyen yang berikut:

“Pemberitahuan pertikaian dan keputusan mengikat oleh Suruhanjaya

30A. (1) Mana-mana pihak kepada sesuatu pertikaian boleh, secara bertulis, memberitahu Suruhanjaya mengenai pertikaian yang tidak dapat diselesaikan itu melalui perundingan di bawah subseksyen 30(1).

(2) Jawatankuasa yang ditubuhkan oleh Suruhanjaya di bawah subseksyen 30(2) hendaklah hanya bersidang untuk menyelesaikan suatu pertikaian itu jika Suruhanjaya berpuas hati bahawa—

(a) suatu persetujuan untuk menyelesaikan pertikaian itu tidak akan tercapai atau tidak akan tercapai dalam masa yang munasabah; dan

(b) pertikaian itu dan pemberitahuannya bukan sesuatu yang ringan, remeh atau menyusahkan.

(3) Jawatankuasa boleh menyelesaikan pertikaian itu atas apa-apa terma dan syarat mengikat yang difikirkannya patut.

(4) Terma dan syarat di bawah subseksyen (3) hendaklah secara bertulis dan disertakan dengan alasan bagi keputusan jawatankuasa itu.

(5) Keputusan jawatankuasa itu hendaklah disifatkan sebagai keputusan Suruhanjaya dan mengikat pihak-pihak itu.

(6) Sesuatu keputusan yang dibuat oleh Suruhanjaya di bawah seksyen ini boleh, dengan izin Mahkamah Sesyen, dikuatkuasakan mengikat cara yang sama sebagaimana penghakiman atau perintah yang sama kesannya oleh Mahkamah Sesyen, dan jika izin telah diberikan sedemikian, penghakiman boleh dibuat mengikat terma keputusan Suruhanjaya itu dan seolah-olah keputusan itu ialah penghakiman Mahkamah itu.

(7) Penghakiman di bawah subseksyen (6) hanya boleh dibuat jika perakuan telah dikeluarkan oleh Suruhanjaya kepada mana-mana pihak bagi izin untuk dibawa ke Mahkamah bagi penguatkuasaan keputusan itu tetapi tiada perakuan dikehendaki jika suatu tindakan diambil oleh Suruhanjaya di bawah seksyen ini.

Daftar keputusan

30B. (1) Suruhanjaya hendaklah menyenggara suatu daftar bagi semua keputusan yang dibuat di bawah seksyen 30A.

(2) Daftar itu hendaklah mengandungi—

(a) nama pihak-pihak kepada pertikaian;

(b) perihalan am mengenai perkara yang berkaitan dengan keputusan itu; dan

(c) tarikh keputusan itu.”.

Pindaan seksyen 32

24. Seksyen 32 Akta ibu dipinda—

(a) dalam subseksyen (1), dengan memasukkan selepas perkataan “pengguna” perkataan “, pemegang lesen atau Pembeli Tunggal”;

(b) dengan memasukkan selepas subseksyen (1) subseksyen yang berikut:

“(1A) Meter hendaklah dipasang, ditentu ukur, diuji, disahkan dan disenggarakan sebagaimana yang ditetapkan atau dengan mengikut mana-mana kod atau garis panduan yang dikeluarkan di bawah Akta ini, mengikut mana-mana yang berkenaan.”;

(c) dalam subseksyen (2), dengan memasukkan selepas perkataan “pemegang lesen” perkataan “yang membekalkan elektrik”;

(d) dalam subseksyen (3)—

- (i) dengan memasukkan selepas perkataan “pengguna” perkataan “, pemegang lesen atau Pembeli Tunggal”; dan
- (ii) dengan memasukkan selepas perkataan “oleh pemegang lesen” perkataan “yang membekalkan elektrik”;

(e) dalam subseksyen (4)—

- (i) dengan memasukkan selepas perkataan “pengguna” perkataan “, pemegang lesen atau Pembeli Tunggal”; dan
- (ii) dengan memasukkan selepas perkataan “pemegang lesen” perkataan “yang membekalkan elektrik”; dan

(f) dalam subseksyen (5), dengan memasukkan selepas perkataan “kegunaan sedemikian” perkataan “dan boleh termasuk meter prabayar, infrastruktur pemeteran, telepemeteran atau apa-apa cara pemeteran lain sebagaimana yang ditentukan oleh Suruhanjaya”.

Pindaan seksyen 33

25. Seksyen 33 Akta ibu dipinda—

- (a) dalam nota bahu, dengan menggantikan perkataan “**Penyiasatan**” dengan perkataan “**dan penyiasatan**”; dan
- (b) dalam perenggan 2(e), dengan menggantikan perkataan “Pengerusi” dengan perkataan “Ketua Pegawai Eksekutif”.

Bahagian baru VIIA

26. Akta ibu dipinda dengan memasukkan selepas seksyen 33 Bahagian yang berikut:

“BAHAGIAN VIIA**KESELAMATAN PEPASANGAN DAN KELENGKAPAN****Tanggungjawab pemegang lesen terhadap keselamatan**

33A. (1) Seseorang pemegang lesen yang mengendalikan dan menyenggara apa-apa infrastruktur bekalan elektrik hendaklah mematuhi apa-apa peraturan yang dibuat di bawah Akta ini, kod keselamatan infrastruktur elektrik, atau jika tiada apa-apa peraturan atau kod, dengan standard dan amalan penggunaan yang berhemat sebagaimana yang ditentukan oleh Suruhanjaya.

(2) Seorang pemegang lesen hendaklah menyediakan suatu pelan pengurusan keselamatan yang memperkatakan perkara-perkara sebagaimana yang ditetapkan dalam kod keselamatan infrastruktur elektrik, atau jika tiada apa-apa kod, dengan standard dan amalan penggunaan yang berhemat sebagaimana yang ditentukan oleh Suruhanjaya.

(3) Mana-mana pemegang lesen yang gagal menyediakan pelan pengurusan keselamatan yang disebut dalam subseksyen (2) melakukan suatu kesalahan dan boleh, apabila disabitkan, didenda tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya.

Tanggungjawab pemunya atau pengendali pemasangan elektrik bukan domestik, pemegang lesen bagi jualan dan pemegang lesen bagi pemasangan persendirian bagi keselamatan

33B. (1) Seseorang pemunya atau pengendali pemasangan elektrik bukan domestik yang berdaftar di bawah Akta ini, pemegang lesen bagi jualan dan pemegang lesen bagi pemasangan persendirian hendaklah mematuhi kod keselamatan pemasangan elektrik bukan domestik dan program pengurusan keselamatan, atau jika tiada apa-apa kod atau program itu, dengan standard dan amalan industri yang berhemat sebagaimana yang ditentukan oleh Suruhanjaya.

(2) Seorang pemunya atau pengendali pemasangan elektrik bukan domestik yang berdaftar di bawah Akta ini, pemegang lesen bagi jualan dan pemegang lesen bagi pemasangan persendirian hendaklah menyediakan program pengurusan keselamatan dalam apa-apa tempoh sebagaimana yang diarahkan oleh Suruhanjaya.

(3) Program pengurusan keselamatan yang disebut dalam subseksyen (2) hendaklah memperuntukkan bagi perkara sebagaimana yang ditetapkan dalam kod keselamatan pemasangan elektrik bukan domestik, atau jika tiada apa-apa kod itu, dengan standard dan amalan industri yang berhemat sebagaimana yang ditentukan oleh Suruhanjaya.

(4) Seorang pemunya atau pengendali pemasangan elektrik bukan domestik yang berdaftar di bawah Akta ini, pemegang lesen bagi jualan dan pemegang lesen bagi pemasangan persendirian yang gagal menyediakan program pengurusan keselamatan yang disebut dalam subseksyen (2) melakukan suatu kesalahan dan boleh, apabila disabitkan, didenda tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya.

Menjalankan kerja elektrik

33c. (1) Seorang orang kompeten atau orang di bawah kawalan orang kompeten yang menjalankan kerja elektrik hendaklah memastikan bahawa kerja elektrik itu mematuhi apa-apa peraturan yang dibuat di bawah Akta ini, kod keselamatan infrastruktur elektrik atau kod keselamatan pemasangan elektrik bukan domestik, mengikut mana-mana yang berkenaan, atau jika tiada apa-apa peraturan atau kod, dengan standard dan amalan industri yang berhemat sebagaimana ditentukan oleh Suruhanjaya.

(2) Orang yang menjalankan kerja elektrik di bawah subseksyen (1) hendaklah memastikan bahawa kerja itu tidak menyebabkan kecederaan berkaitan elektrik terhadap mana-mana orang atau kerosakan kepada apa-apa harta benda.

Tanggungjawab yang berhubungan dengan kerja selain kerja elektrik

33d. (1) Mana-mana orang yang menjalankan apa-apa pembinaan, pembangunan, pengubahsuaian atau kerja selain kerja elektrik berhampiran dengan pemasangan elektrik

hendaklah memastikan bahawa kerja itu tidak menyebabkan gangguan kepada bekalan elektrik atau kecederaan berhubung elektrik kepada mana-mana orang atau kerosakan terhadap apa-apa harta benda.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi dua puluh lima ribu ringgit dan, dalam hal kesalahan yang berterusan, didenda tidak melebihi lima ratus ringgit bagi tiap-tiap hari atau sebahagian daripada sehari kesalahan itu berterusan selepas sabitan.

Pematuhan pemeriksaan

33E. (1) Suruhanjaya boleh, memeriksa atau menyebabkan supaya diperiksa suatu infrastruktur bekalan elektrik, pemasangan elektrik bukan domestik atau tempat perniagaan atau apa-apa aktiviti pengilang berdaftar atau pengimport atau suatu badan penilaian pematuhan berdaftar atau pusat latihan dan pemeriksaan berdaftar atau institusi untuk memastikan bahawa pemegang lesen, pemegang lesen bagi jualan dan pemegang lesen bagi pemasangan persendirian, pemunya atau pengendali pemasangan elektrik bukan domestik, pengilang berdaftar atau pengimport, atau badan penilaian pematuhan berdaftar atau pusat latihan dan pemeriksaan berdaftar atau institusi, mengikut mana-mana yang berkenaan, mematuhi Akta ini, apa-apa peraturan yang dibuat di bawah Akta ini, garis panduan, kod atau arahan yang dikeluarkan oleh Suruhanjaya di bawah Akta ini, pelan pengurusan keselamatan dan program pengurusan keselamatan, mengikut mana-mana yang berkenaan.

(2) Suruhanjaya boleh memeriksa atau menyebabkan supaya diperiksa apa-apa kelengkapan, di mana-mana premis, bangunan, kemudahan termasuk kemudahan sementara dan kenderaan yang digunakan bagi penjualan atau tawaran bagi penjualan secara jualan untuk menentukan jika kelengkapan itu mematuhi standard sebagaimana yang ditentukan oleh Suruhanjaya.

Tafsiran

33F. Bagi maksud Bahagian ini—

“kod keselamatan infrastruktur elektrik” ertinya sesuatu kod yang dibangunkan, dikeluarkan dan didaftarkan oleh Suruhanjaya di bawah seksyen 50A mengenai kehendak keselamatan, standard keselamatan dan teknikal, pengendalian, penyenggaraan dan perlindungan sistem elektrik yang bersesuaian dan perkara berkaitan yang lain mengenai infrastruktur bekalan elektrik;

“kod keselamatan pemasangan elektrik bukan domestik” ertinya sesuatu kod yang dibangunkan, dikeluarkan dan didaftarkan oleh Suruhanjaya di bawah seksyen 50A mengenai kehendak keselamatan, standard keselamatan dan teknikal yang bersesuaian, pengendalian, penyenggaraan dan perlindungan sistem elektrik dan perkara berkaitan yang lain mengenai pemasangan elektrik bukan domestik;

“pelan pengurusan keselamatan” ertinya pelan pengurusan keselamatan, kebolehpercayaan, penyenggaraan dan teknikal berkenaan dengan infrastruktur bekalan elektrik;

“pemegang lesen” tidak termasuk pemegang lesen bagi jualan dan pemegang lesen bagi pemasangan persendirian;

“pemunya atau pengendali pemasangan elektrik bukan domestik” ertinya seseorang yang mempunyai, menggunakan, bekerja atau mengendalikan pemasangan elektrik bukan domestik;

“pemasangan elektrik bukan domestik” ertinya suatu set dawai dan lekapan, kelengkapan dan aksesori yang berkaitan yang dipasang di suatu tempat bagi membawa, mengawal atau menggunakan elektrik yang sedang, atau akan, atau telah, dibekalkan bagi penggunaan di tempat itu, tetapi tidak termasuk—

- (a) apa-apa infrastruktur bekalan elektrik yang dipunyai atau dikendalikan oleh seseorang pemegang lesen;
- (b) apa-apa dawai, lekapan, kelengkapan atau aksesori yang disambungkan kepada dan melampaui apa-apa aliran keluar elektrik di mana pendawaian tetap tamat, selain apa-apa aliran keluar yang digunakan untuk menyambungkan bahagian pendawaian tetap; atau

(c) premis kediaman persendirian;

“program pengurusan keselamatan” ertinya program pengurusan keselamatan, kebolehpercayaan, penyenggaraan dan teknikal berkenaan dengan pemasangan elektrik bukan domestik.”.

Pindaan seksyen 36

27. Seksyen 36 Akta ibu dipinda—

(a) dalam subseksyen (1), dengan memasukkan sebelum perkataan “dikehendaki ditentukan” perkataan “disifatkan patut oleh Suruhanjaya di bawah seksyen 30 atau”; dan

(b) dalam subseksyen (3), dengan menggantikan perkataan “Akta Timbang Tara 1952 [*Akta 93*]” dengan perkataan “Akta Timbang Tara 2005 [*Akta 646*]”.

Pindaan seksyen 37

28. Seksyen 37 Akta ibu dipinda—

(a) dalam subseksyen (1)—

(i) dengan menggantikan perkataan “satu ratus ribu” dengan perkataan “satu juta”; dan

(ii) dengan menggantikan perkataan “lima” dengan perkataan “sepuluh”;

(b) dalam subseksyen (2)—

(i) dengan menggantikan perkataan “lima puluh ribu” dengan perkataan “satu ratus ribu”; dan

(ii) dengan menggantikan perkataan “tiga” dengan perkataan “lima”;

(c) dalam subseksyen (3), dengan menggantikan perkataan “adalah melakukan suatu kesalahan dan boleh dikenakan, apabila disabitkan, denda tidak melebihi satu ratus ribu ringgit atau penjara selama tempoh tidak melebihi tiga tahun atau kedua-duanya” dengan perkataan yang berikut:

“melakukan suatu kesalahan dan boleh, apabila disabitkan—

(A) dikenakan:

(i) dalam hal pengguna domestik, denda tidak kurang daripada satu ribu ringgit dan tidak melebihi lima puluh ribu ringgit atau pemenjaraan selama tempoh tidak melebihi satu tahun atau kedua-duanya; dan

(ii) dalam hal pengguna bukan domestik, denda tidak kurang daripada dua puluh ribu ringgit dan tidak melebihi satu juta ringgit atau pemenjaraan selama tempoh tidak melebihi lima tahun atau kedua-duanya; dan

(B) dikenakan bagi kesalahan kedua dan yang berikutnya:

(i) dalam hal pengguna domestik, denda tidak kurang daripada lima ribu ringgit dan tidak melebihi satu ratus ribu ringgit atau pemenjaraan selama tempoh tidak melebihi tiga tahun atau kedua-duanya; dan

(ii) dalam hal pengguna bukan domestik, denda tidak kurang daripada satu ratus ribu ringgit dan tidak melebihi lima juta ringgit atau pemenjaraan selama tempoh tidak melebihi sepuluh tahun atau kedua-duanya.”;

(d) dalam subseksyen (10), dengan menggantikan perkataan “satu ribu” dengan perkataan “dua puluh lima ribu”;

(e) dalam subseksyen (12)—

- (i) dalam perenggan (a), dengan memasukkan selepas perkataan “sebahagian daripadanya” perkataan “yang ditetapkan”; dan
- (ii) dalam perenggan (b), dengan menggantikan perkataan “lima” dengan perkataan “lima puluh”;

(f) dalam subseksyen (14)—

- (i) dengan memasukkan selepas perkataan “merosakkan” perkataan “atau mengalihkan”; dan
- (ii) dengan menggantikan perkataan “lima” dengan perkataan “lima puluh”;

(g) dengan menggantikan subseksyen (15) dengan subseksyen yang berikut:

“(15) Mana-mana orang—

- (a) yang didapati bersalah atas apa-apa kesalahan terhadap Akta ini yang tiada penalti diperuntukkan secara nyata boleh, apabila disabitkan, didenda tidak melebihi dua puluh lima ribu ringgit dan, dalam hal kesalahan yang berterusan, didenda tidak melebihi lima ratus ringgit bagi tiap-tiap hari atau sebahagian daripada sehari kesalahan itu berterusan selepas sabitan;
- (b) yang dengan apa-apa perbuatan atau peninggalan melanggar mana-mana peruntukan di bawah Akta ini melakukan suatu kesalahan dan jika tiada penalti diperuntukkan secara nyata boleh, apabila disabitkan, didenda tidak melebihi lima puluh ribu ringgit dan, dalam hal kesalahan yang berterusan, didenda tidak melebihi lima ratus ringgit bagi tiap-tiap hari atau sebahagian daripada sehari kesalahan itu berterusan selepas sabitan.”; dan

(h) dengan menggantikan subseksyen (16) dengan subseksyen yang berikut:

“(16) Bagi maksud subseksyen(3)—

“pepasangan domestik” ertinya pemasangan di rumah kediaman persendirian yang tidak digunakan dalam mana-mana hotel atau rumah tumpangan atau bagi maksud menjalankan apa-apa perniagaan, perdagangan, profesion atau perkhidmatan;

“pengguna bukan domestik” ertinya pengguna elektrik selain pengguna domestik;

“pengguna domestik” ertinya pengguna bagi pemasangan domestik yang dibekalkan atau yang berkaitan dengan elektrik.”.

Seksyen baru 37A dan 37B

29. Akta ibu dipinda dengan memasukkan selepas seksyen 37 seksyen yang berikut:

“Kesalahan yang dilakukan oleh pertubuhan perbadanan

37A. (1) Jika suatu kesalahan terhadap Akta ini atau perundangan subsidiarinya telah dilakukan oleh sesuatu pertubuhan perbadanan, mana-mana orang yang pada masa pelakuan kesalahan itu ialah pengarah, ketua pegawai eksekutif, ketua pegawai operasi, pengurus, setiausaha atau pegawai serupa yang lain dalam pertubuhan perbadanan itu atau yang berupa bertindak atas sifat sedemikian atau yang mengikut apa-apa cara atau pada apa-apa takat tanggungjawab bagi pengurusan apa-apa hal ehwal pertubuhan perbadanan itu atau yang membantu dalam pengurusan sedemikian—

(a) boleh dipertuduh secara berasingan atau berseksama dalam prosiding yang sama bersekali dengan pertubuhan perbadanan itu; dan

(b) jika pertubuhan perbadanan itu didapati telah melakukan kesalahan, hendaklah disifatkan telah melakukan kesalahan itu melainkan jika dengan mengambil kira jenis fungsinya atas sifat itu dan segala hal keadaan, dia membuktikan—

(i) bahawa kesalahan itu telah dilakukan tanpa pengetahuan, persetujuan atau pembiarannya; dan

(ii) bahawa dia telah mengambil segala langkah yang munasabah dan telah menjalankan usaha yang wajar untuk mencegah pelakuan kesalahan itu.

(2) Jika mana-mana orang boleh di bawah Akta ini atau mana-mana peraturan yang dibuat di bawah Akta ini, dikenakan apa-apa hukuman atau penalti bagi apa-apa perbuatan, peninggalan, pengabaian atau keingkaran, dia boleh dikenakan hukuman atau penalti yang sama bagi tiap-tiap perbuatan, peninggalan, pengabaian atau keingkaran itu oleh mana-mana pekerja, pekhidmat atau ejennya, atau pekerja atau pekhidmat ejen itu jika perbuatan, peninggalan, pengabaian atau keingkaran itu telah dilakukan—

(a) oleh pekerja atau pekhidmat orang itu dalam perjalanan urusan pekerjaannya;

(b) oleh ejen itu semasa bertindak bagi pihak orang itu; atau

(c) oleh pekerja atau pekhidmat ejen itu dalam perjalanan urusan pekerjaannya dengan ejen itu atau selainnya bagi pihak ejen yang bertindak bagi pihak orang itu.

Kesalahan cubaan dan subahat

37B. Jika mana-mana orang—

(a) membantu, bersubahat, menolong, menghasut atau mendorong mana-mana orang lain untuk membuat atau membuat bagi pihak seorang yang lain suatu penyata, akaun, pernyataan atau perisytiharan yang salah atau melakukan apa-apa kesalahan yang boleh dihukum di bawah Akta ini; atau

- (b) cuba untuk membuat atau membuat bagi pihak seorang yang lain suatu penyata, akaun, pernyataan atau perisytiharan yang salah atau melakukan apa-apa kesalahan yang boleh dihukum di bawah Akta ini,

orang itu melakukan suatu kesalahan dan boleh, apabila disabitkan, dihukum dengan hukuman yang diperuntukkan bagi kesalahan itu di bawah Akta ini dengan syarat bahawa apa-apa tempoh pemenjaraan yang dikenakan tidak melebihi satu setengah daripada tempoh terpanjang yang diperuntukkan bagi kesalahan itu.”.

Pindaan seksyen 38

30. Seksyen 38 Akta ibu dipinda—

- (a) dengan menggantikan subseksyen (1) dengan subseksyen yang berikut:

“(1) Jika mana-mana orang yang diambil kerja oleh pemegang lesen mendapati keterangan di mana-mana premis yang memberikan alasan yang munasabah untuk dia mempercayai bahawa suatu kesalahan telah dilakukan di bawah subseksyen 37(1), (3) atau (14), pemegang lesen atau mana-mana orang yang telah diberi kuasa sewajarnya oleh pemegang lesen hendaklah dalam masa tiga hari bekerja dari tarikh dapatan itu memaklumkan Suruhanjaya secara bertulis, dan pemegang lesen itu boleh, dengan memberikan notis tidak kurang daripada empat puluh lapan jam dari tarikh yang sama mengikut apa-apa bentuk sebagaimana yang ditetapkan, menyebabkan bekalan elektrik dipotong daripada premis itu.”;

- (b) dengan memasukkan selepas subseksyen (1A) subseksyen yang berikut:

“(1B) Apabila menerima apa-apa maklumat di bawah subseksyen (1), Suruhanjaya boleh menentusahkan perkara itu dan dalam hal jika Suruhanjaya mendapati bahawa tiada kesalahan telah dilakukan, bekalan elektrik hendaklah disambung semula dengan serta-merta.”;

- (c) dengan menggantikan subseksyen (3) dengan subseksyen yang berikut:

“(3) Pemegang lesen boleh menghendaki pengguna supaya membayar kepadanya bagi kerugian hasil yang disebabkan oleh kesalahan yang dilakukan di bawah subseksyen 37(1), (3) dan (14) dan apa-apa perbelanjaan yang munasabah yang dilakukan secara terus oleh pemegang lesen di bawah seksyen ini termasuk perbelanjaan yang dilakukan berkenaan dengan penyambungan semula elektrik mengikut cara sebagaimana yang telah diarahkan oleh Suruhanjaya:

Dengan syarat bahawa dan tertakluk kepada subseksyen (4), jika pemegang lesen tidak meneruskan tuntutan bagi kerugian hasil dan perbelanjaan itu di mahkamah, pemegang lesen hanya boleh menuntut terhadap pengguna bagi kerugian hasil dan perbelanjaan tersebut bagi tempoh tidak melebihi enam bulan ke belakang dari tarikh kesalahan itu disedari di bawah subseksyen (1).”;

- (d) dalam subseksyen (4)—

(i) dengan memasukkan selepas perkataan “subseksyen (3)” perkataan “dan pernyataan bertulis itu hendaklah diberitahu kepada pengguna dalam masa empat belas hari bekerja atau apa-apa tempoh yang dilanjutkan dengan kelulusan bertulis Suruhanjaya selepas pemotongan itu”; dan

- (ii) dalam perenggan (a)—

(A) dengan memasukkan sebelum perkataan “dilakukan” perkataan “munasabah”;

(B) dengan memotong perkataan “dan” di hujung perenggan itu; dan

(C) dengan memasukkan selepas perenggan (a), perenggan yang berikut:

“(aa) cara pengiraan kerugian hasil dan butiran perbelanjaan; dan”;
dan

- (e) dalam subseksyen (5), dengan memasukkan selepas perkataan “pernyataan bertulis” perkataan “di bawah subseksyen (4)”.

Penggantian seksyen 43

31. Akta ibu dipinda dengan menggantikan seksyen 43 dengan seksyen yang berikut:

“Pengkompaunan

43. (1) Menteri boleh, dengan keizinan Pendakwa Raya, membuat peraturan-peraturan untuk menetapkan—

- (a) mana-mana kesalahan di bawah Akta ini atau perundangan subsidiarinya sebagai suatu kesalahan yang boleh dikompaun;
- (b) kriteria bagi mengkompaun kesalahan itu; dan
- (c) kaedah dan tatacara bagi mengkompaun kesalahan itu.

(2) Suruhanjaya boleh, dengan keizinan secara bertulis Pendakwa Raya, pada bila-bila masa sebelum pertuduhan dimulakan mengkompaun mana-mana kesalahan yang ditetapkan dalam peraturan-peraturan sebagai suatu kesalahan yang boleh dikompaun dengan membuat tawaran bertulis kepada orang yang disyaki dengan munasabah telah melakukan kesalahan itu untuk mengkompaun kesalahan itu apabila dibayar kepada Suruhanjaya jumlah wang yang tidak melebihi lima puluh peratus daripada amaun denda maksimum yang orang itu boleh dikenakan jika dia telah disabitkan atas kesalahan itu, dalam apa-apa tempoh sebagaimana yang dinyatakan dalam tawaran bertulisnya.

(3) Suatu tawaran di bawah subseksyen (2) boleh dibuat pada bila-bila masa selepas kesalahan telah dilakukan tetapi sebelum apa-apa pendakwaan baginya dimulakan, dan jika amaun yang dinyatakan dalam tawaran itu tidak dibayar

dalam masa yang dinyatakan dalam tawaran itu, atau apa-apa pelanjutan masa yang boleh diberikan oleh Suruhanjaya, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu dibuat.

(4) Jika suatu kesalahan telah dikompaun di bawah subseksyen (2), tiada pendakwaan boleh dimulakan berkenaan dengan kesalahan itu terhadap orang yang kepadanya tawaran untuk mengkompaun itu dibuat, dan mana-mana dokumen atau benda yang disita berkaitan dengan kesalahan itu boleh dilepaskan oleh Suruhanjaya, tertakluk kepada apa-apa terma dan syarat sebagaimana yang difikirkannya patut.

(5) Semua jumlah wang yang diterima oleh Suruhanjaya di bawah seksyen ini hendaklah dibayar ke dalam dan menjadi sebahagian daripada Kumpulan Wang Disatukan Persekutuan.”.

Seksyen baru 44A

32. Akta ibu dipinda dengan memasukkan selepas seksyen 44 seksyen yang berikut:

“Penggunaan talian bekalan, dsb., bagi maksud komunikasi di bawah Akta Komunikasi dan Multimedia 1998

44A. (1) Walau apa pun mana-mana peruntukan lain dalam Akta ini dan tertakluk kepada peruntukan seksyen ini dan apa-apa terma dan syarat sebagaimana yang ditetapkan, mana-mana talian bekalan, sebahagian daripada infrastruktur bekalan elektrik, pemasangan, loji atau kelengkapan boleh digunakan bagi maksud komunikasi di bawah Akta Komunikasi dan Multimedia 1998 [*Akta 588*].

(2) Bagi maksud subseksyen (1), Suruhanjaya boleh mengeluarkan kod, garis panduan atau arahan.

(3) Sebelum dan semasa pengendalian komunikasi, mengikut mana-mana yang berkenaan, pemegang lesen, pemunya atau pengendali pemasangan elektrik bukan domestik, pengguna elektrik dan orang yang dilesenkan di bawah Akta Komunikasi dan Multimedia 1998 hendaklah mematuhi apa-apa peraturan, kod, garis panduan dan arahan yang disebut dalam subseksyen (1) dan (2).

(4) Pemegang lesen, pemunya atau pengendali pemasangan elektrik bukan domestik dan orang yang dilesenkan di bawah Akta Komunikasi dan Multimedia 1998 hendaklah bertanggungjawab bagi memastikan bahawa penyediaan atau pengendalian komunikasi itu, mengikut mana-mana yang berkenaan, mematuhi Akta.

(5) Mana-mana pemunya atau penduduk suatu pemasangan elektrik di premis kediaman atau pengguna elektrik boleh memilih untuk menjadi pengguna atau selainnya bagi perkhidmatan komunikasi yang disediakan oleh orang yang dilesenkan di bawah Akta Komunikasi dan Multimedia 1998 yang hendaklah mendapatkan persetujuan yang nyata daripada pemunya atau penduduk atau pengguna itu sebelum menyediakan perkhidmatan komunikasi.

(6) Walau apa pun mana-mana peruntukan Akta Komunikasi dan Multimedia 1998, mana-mana pemegang lesen atau orang yang dilesenkan di bawah Akta Komunikasi dan Multimedia 1998 yang tidak mematuhi mana-mana peruntukan seksyen ini melakukan suatu kesalahan.”.

Bahagian baru IXA

33. Akta ibu dipinda dengan memasukkan selepas seksyen 44A Bahagian yang berikut:

“BAHAGIAN IXA

KUMPULAN WANG INDUSTRI ELEKTRIK

Sumbangan oleh pemegang lesen

44B. (1) Seseorang pemegang lesen hendaklah, jika dikehendaki oleh Menteri di bawah mana-mana peraturan yang dibuat di bawah Akta ini atau melalui perintah yang disiarkan dalam *Warta* menurut syor yang dibuat oleh Suruhanjaya, menguntukkan dan membayar ke dalam Kumpulan Wang Industri Elektrik, mengikut apa-apa cara dan pada apa-apa kadar sebagaimana yang ditetapkan dalam peraturan-peraturan atau perintah itu.

(2) Atas syor Suruhanjaya, Menteri boleh menggantung atau membatalkan kehendak yang dibuat di bawah subseksyen (1).

Kumpulan Wang Industri Elektrik

44c. (1) Suatu Kumpulan Wang yang dikenali sebagai “Kumpulan Wang Industri Elektrik” ditubuhkan dan hendaklah ditadbirkan dan dikawal oleh Suruhanjaya.

(2) Kumpulan Wang Industri Elektrik hendaklah terdiri daripada—

- (a) apa-apa jumlah wang yang diuntukkan dan dibayar oleh pemegang lesen menurut seksyen 44B;
- (b) apa-apa jumlah wang yang diuntukkan oleh Parlimen bagi maksud Kumpulan Wang Industri Elektrik dari semasa ke semasa;
- (c) semua wang yang diperolehi sebagai pendapatan daripada pelaburan yang dibuat daripada Kumpulan Wang Industri Elektrik, termasuk faedah pendapatan; dan
- (d) semua wang lain yang diterima secara sah oleh Suruhanjaya bagi pihak Kumpulan Wang Industri Elektrik.

(3) Kumpulan Wang Industri Elektrik hendaklah dibelanjakan bagi maksud yang berikut:

- (a) untuk menguruskan impak tarif elektrik terhadap pengguna; atau
- (b) apa-apa maksud lain yang berkaitan dengan industri elektrik sebagaimana yang disifatkan perlu oleh Suruhanjaya.

Pelaburan

44d. (1) Wang dalam Kumpulan Wang Industri Elektrik hendaklah, setakat yang tidak dikehendaki atau tidak dengan serta-merta dikehendaki untuk dibelanjakan oleh Suruhanjaya bagi maksud subseksyen 44c(3), dilaburkan mengikut apa-apa cara sebagaimana yang diluluskan oleh Menteri dengan persetujuan Menteri Kewangan.

(2) Suruhanjaya hendaklah membuka dan menyenggara suatu akaun atau akaun-akaun untuk memegang wang dalam Kumpulan Wang Industri Elektrik dengan mana-mana bank atau bank-bank di Malaysia sebagaimana yang difikirkan patut oleh Suruhanjaya, selepas berunding dengan Menteri dan Menteri Kewangan, dan tiap-tiap akaun itu hendaklah dikendalikan mengikut apa-apa cara sebagaimana yang dibenarkan oleh Suruhanjaya bagi maksud itu dari semasa ke semasa.

Akaun

44E. (1) Suruhanjaya hendaklah menyebabkan supaya disimpan akaun yang sepatutnya bagi Kumpulan Wang Industri Elektrik dan laporan yang sepatutnya mengenai aktivitinya berkenaan dengan Kumpulan Wang itu dan hendaklah, dengan secepat yang dapat dilaksanakan selepas berakhirnya tahun kewangan Suruhanjaya, menyebabkan supaya disediakan bagi tahun kewangan itu—

- (a) suatu penyata akaun yang hendaklah termasuk kunci kira-kira dan akaun bagi sumbangan dan perbelanjaan; dan
- (b) suatu pernyataan mengenai aktivitinya.

(2) Suruhanjaya hendaklah dengan secepat yang dapat dilaksanakan menghantar suatu salinan penyata akaun yang diperakui oleh juruaudit dan salinan laporan juruaudit kepada Menteri yang hendaklah menyebabkannya dibentangkan di hadapan kedua-dua Majlis Parlimen.”.

Pindaan seksyen 45

34. Subseksyen 45(1) Akta ibu dipinda dengan memotong perkataan “telegraf, telefon, radio”.

Seksyen baru 45A, 45B dan 45C

35. Akta ibu dipinda dengan memasukkan selepas seksyen 45 seksyen yang berikut:

“Pengauditan pemegang lesen, pemunya atau pengendali pemasangan elektrik bukan domestik

45A. (1) Suruhanjaya boleh menjalankan audit pada bila-bila masa atau pada apa-apa lat tempoh sebagaimana yang ditentukan olehnya menghendaki seseorang pemegang lesen atau pemunya atau pengendali pemasangan elektrik bukan domestik untuk melantik dengan kos ditanggung sendiri seorang pakar bebas untuk mengaudit apa-apa perkara di bawah Bahagian IV dan keselamatan pemasangan dan kelengkapan di bawah Bahagian VIIA Akta ini atau apa-apa maklumat yang diberikan oleh pemegang lesen atau pemunya atau pengendali pemasangan elektrik bukan domestik kepada Suruhanjaya.

(2) Audit hendaklah dijalankan dengan mengikut mana-mana kod, garis panduan atau arahan yang dikeluarkan oleh Suruhanjaya di bawah Akta ini.

(3) Suruhanjaya boleh menentukan kelas atau kategori pemegang lesen atau pemunya atau pengendali pemasangan elektrik bukan domestik yang tertakluk kepada audit.

(4) Pemegang lesen atau pemunya atau pengendali pemasangan elektrik bukan domestik hendaklah membuktikan sehingga memuaskan hati Suruhanjaya bahawa pakar bebas yang disebut dalam subseksyen (1) mempunyai kelayakan dan kekompetenan yang perlu.

(5) Pemegang lesen atau pemunya atau pengendali pemasangan elektrik bukan domestik itu hendaklah mengemukakan suatu salinan laporan audit itu kepada Suruhanjaya dalam masa yang dinyatakan oleh Suruhanjaya.

(6) Pemegang lesen atau pemunya atau pengendali pemasangan elektrik bukan domestik yang—

(a) gagal memberikan apa-apa maklumat sebagaimana yang dikehendaki oleh Suruhanjaya di bawah seksyen 52B;

(b) dengan sengaja mengubah, menyembunyikan atau memusnahkan apa-apa dokumen atau maklumat yang dia dikehendaki untuk mengemukakan melalui notis bertulis; atau

- (c) enggan untuk membantu atau memudahkan, atau menghalang Suruhanjaya, pegawai diberi kuasanya atau perunding yang dilantik dalam menjalankan sesuatu pengauditan di bawah seksyen ini,

melakukan suatu kesalahan.

Penentuan standard pemasangan atau kelengkapan

45B. Suruhanjaya boleh menentukan standard yang boleh dipakai bagi apa-apa pemasangan atau kelengkapan dan standard itu sebagaimana yang ditetapkan dalam apa-apa peraturan, kod atau garis panduan yang dibuat atau dikeluarkan di bawah Akta ini.

Penyimpanan rekod dan dokumen

45C. Seseorang pemegang lesen, pemunya dan pengendali pemasangan elektrik bukan domestik, pengilang atau pengimport berdaftar, unit pendawaian persendirian berdaftar, kontraktor perkhidmatan elektrik berdaftar, kontraktor tanda elektrik berdaftar, pengilang papan suis berdaftar, kontraktor elektrik berdaftar, pusat latihan dan pemeriksaan berdaftar atau institusi dan badan penilaian pematuhan berdaftar hendaklah menyimpan rekod dan dokumen berkenaan dengan perkara dan bagi tempoh masa yang ditetapkan.”.

Pindaan seksyen 46

36. Subseksyen 46(1) Akta ibu dipinda—

- (a) dengan memasukkan selepas perkataan “pengendalian apa-apa pemasangan” perkataan “, infrastruktur pemetaran, telepemetaran, aplikasi komunikasi atas talian bekalan,”; dan
- (b) dengan menggantikan perkataan “komunikasi radio, telekomunikasi, telegraf, telefon” dengan perkataan “komunikasi”.

Pindaan seksyen 48

37. Subseksyen 48(1) Akta ibu dipinda dengan memasukkan selepas perkataan “di bawah Akta ini” perkataan “, yang diperuntukkan dalam kod yang berkaitan yang dikeluarkan di bawah Akta ini”.

Seksyen baru 50A, 50B, 50C, 50D, 50E dan 50F

38. Akta ibu dipinda dengan memasukkan selepas seksyen 50 seksyen yang berikut:

“Pembangunan kod oleh Suruhanjaya dan pematuhan baginya

50A. (1) Suruhanjaya boleh, dengan kelulusan Menteri, membangunkan dan mengeluarkan kod yang berhubungan dengan penjanakuasaan, penghantaran, pengagihan, pembekalan dan penggunaan elektrik dan bagi keselamatan elektrik.

(2) Suruhanjaya boleh membangunkan dan mengeluarkan apa-apa kod tambahan sebagaimana yang disifatkannya patut dan suai manfaat atau sebagaimana yang diarahkan oleh Menteri dari semasa ke semasa, mengikut mana-mana yang berkenaan.

(3) Semua kod yang dibangunkan dan dikeluarkan menurut seksyen ini hendaklah berkuat kuasa hanya apabila didaftarkan oleh Suruhanjaya.

(4) Semua pemegang lesen, pemunya atau pengendali pemasangan elektrik bukan domestik hendaklah mematuhi kod itu.

(5) Melainkan jika ditentukan selainnya oleh Suruhanjaya, dalam memastikan kebolehpercayaan, keselamatan dan keterjaminan rangkaian elektrik, kod yang dikeluarkan di bawah seksyen ini hendaklah mengatasi mana-mana perjanjian yang mungkin wujud antara pihak-pihak yang disebut dalam subseksyen (4).

Penahanan dokumen oleh Suruhanjaya

50B. (1) Mana-mana pemegang lesen, pemunya atau pengendali pemasangan elektrik bukan domestik apabila diarahkan oleh Suruhanjaya hendaklah memberikan dokumen kepada Suruhanjaya, dan jika tidak berbuat demikian Suruhanjaya boleh mengambil milikan dokumen itu.

(2) Apa-apa dokumen yang diberikan atau yang diambil oleh Suruhanjaya di bawah subseksyen (1) boleh ditahan seberapa lama yang perlu oleh Suruhanjaya.

(3) Orang yang selainnya berhak kepada milikan dokumen itu berhak untuk dibekalkan, dengan secepat yang dapat dilaksanakan, dengan salinan yang diperakui oleh Suruhanjaya sebagai suatu salinan sah.

(4) Sehingga suatu salinan terperaku dibekalkan, Suruhanjaya boleh, pada bila-bila masa dan di mana-mana tempat yang difikirkan sesuai oleh Suruhanjaya, membenarkan orang yang selainnya berhak kepada milikan dokumen itu atau orang yang diberi kuasa oleh orang itu, untuk memeriksa dan membuat salinan atau mengambil cabutan daripada dokumen itu.

(5) Jika Suruhanjaya berpuas hati bahawa penahanan dokumen itu tidak lagi diperlukan, Suruhanjaya boleh mengembalikan dokumen itu dengan secepat yang dapat dilaksanakan kepada orang yang memberikan dokumen itu di bawah subseksyen (1).

Garis panduan atau arahan oleh Suruhanjaya

50c. (1) Suruhanjaya boleh, dari semasa ke semasa, mengeluarkan garis panduan atau arahan mengenai apa-apa perkara sebagaimana yang diperuntukkan di bawah Akta ini kepada mana-mana pemegang lesen, pemunya atau pengendali pemasangan elektrik bukan domestik, pengilang atau pengimport berdaftar, orang kompeten atau mana-mana orang.

(2) Suruhanjaya boleh, dari semasa ke semasa, mengeluarkan apa-apa arahan secara bertulis kepada mana-mana pemegang lesen, pemunya atau pengendali pemasangan elektrik bukan

domestik, pengilang atau pengimport berdaftar, orang kompeten atau mana-mana orang mengenai pematuhan atau ketidakpatuhan Akta atau mana-mana peraturan yang dibuat di bawah Akta ini, syarat lesen, termasuk meremedikan pelanggaran syarat lesen atau mengenai apa-apa perkara lain yang menghendaki suatu arahan dibuat atau secara khususnya dibuat menjadi subjek arahan di bawah Akta ini mengikut tatacara yang ditetapkan.

(3) Garis panduan atau arahan yang dikeluarkan oleh Suruhanjaya di bawah seksyen ini hendaklah didaftarkan dan hendaklah berkuat kuasa dari tarikh pendaftaran atau apa-apa tarikh yang kemudian sebagaimana yang dinyatakan oleh Suruhanjaya dalam garis panduan atau arahan itu.

(4) Seorang pemegang lesen atau pemunya atau pengendali pemasangan elektrik bukan domestik, pengilang atau pengimport berdaftar, orang kompeten atau mana-mana orang hendaklah mematuhi garis panduan dan arahan itu.

Perubahan, kajian semula atau pembatalan kod, garis panduan atau arahan oleh Suruhanjaya

50d. (1) Suruhanjaya boleh mengubah, mengkaji semula atau membatalkan apa-apa kod, garis panduan atau arahan yang dikeluarkan di bawah Akta ini.

(2) Tatacara yang dinyatakan dalam subseksyen 50c(3) dan (4) hendaklah terpakai berkenaan dengan apa-apa perubahan, kajian semula atau pembatalan kod, garis panduan atau arahan itu.

Kesalahan bagi ketidakpatuhan kod, garis panduan atau arahan Suruhanjaya

50e. Seseorang yang tidak mematuhi mana-mana kod, garis panduan atau arahan Suruhanjaya yang dikeluarkan di bawah Akta ini, melakukan suatu kesalahan dan boleh, apabila disabitkan, didenda tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

Daftar kod, garis panduan atau arahan

50f. Suruhanjaya hendaklah menyenggara suatu daftar bagi semua kod, garis panduan atau arahan yang dikeluarkan oleh Suruhanjaya di bawah Akta ini, termasuk apa-apa perubahan, kajian semula atau pembatalan kod, garis panduan atau arahan itu.”.

Seksyen baru 52A dan 52B

39. Akta ibu dipinda dengan memasukkan selepas seksyen 52 seksyen yang berikut:

“Jaminan maklumat infrastruktur bekalan

52A. (1) Mana-mana pemegang lesen sebagaimana yang diarahkan oleh Suruhanjaya yang menyediakan bekalan elektrik kepada pengguna hendaklah bertanggungjawab bagi memelihara kerahsiaan, keutuhan dan ketersediaan maklumatnya, sistem maklumat dan infrastruktur rangkaian sokongan yang berkenaan dengan kewajipan dan perkara-perkara lain sebagaimana yang diperuntukkan di bawah Akta ini.

(2) Pemegang lesen hendaklah—

(a) mengambil langkah-langkah yang perlu, mewujudkan dan melaksanakan standard dan menggunakan kawalan jaminan maklumat yang berkaitan untuk menghalang, mengelakkan, meremedikan, mendapatkan kembali atau meletakkan semula maklumat, dokumen, alat atau rekodnya yang disimpan dalam komputernya dan bagi sistem pengendalian komputernya daripada apa-apa risiko—

(i) ancaman atau akses tanpa kebenaran; dan

(ii) gangguan atau penyingkiran;

(b) mengambil langkah-langkah yang perlu untuk memastikan ketahanan infrastruktur rangkaian sokongannya untuk mengurangkan impak perniagaan terhadap pelbagai ancaman kepada aktiviti di bawah lesennya; dan

- (c) memastikan bahawa kebolehpercayaan, keberterusan dan kualiti bekalan elektrik, pelaksanaan kewajipannya dan kepatuhan kepada peruntukan Akta ini dan mana-mana peraturan yang dibuat di bawahnya tidak terjejas,

dan hendaklah melaporkan kepada Suruhanjaya dalam masa yang dinyatakan oleh Suruhanjaya, dan sekiranya berlaku apa-apa kejadian yang mengganggu atau menjejaskan prestasi aktiviti di bawah lesen, melaporkan kejadian itu dengan segera kepada Suruhanjaya dan pihak berkuasa lain yang berkaitan.

(3) Mana-mana pemegang lesen yang tidak mematuhi, mengabaikan untuk mematuhi atau melanggar mana-mana peruntukan seksyen ini melakukan suatu kesalahan dan boleh, apabila disabitkan, didenda tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

- (4) Bagi maksud seksyen ini—

“infrastruktur rangkaian sokongan” merujuk kepada sambungan yang berkaitan, peranti rangkaian, perkakasan dan perisian yang menyediakan perkhidmatan rangkaian dalam menyokong fungsi perniagaan;

“kawalan jaminan maklumat” merujuk kepada cara pengurusan risiko, termasuk dasar, tatacara, garis panduan, amalan atau struktur organisasi, yang boleh dari jenis pentadbiran, teknikal, pengurusan atau perundangan;

“ketahanan” ertinya kebolehan sesuatu organisasi untuk menahan daripada terjejas oleh sesuatu kejadian.

Obligasi untuk memberikan maklumat

52B. (1) Suruhanjaya boleh memberi kuasa mana-mana pegawai untuk mendapatkan apa-apa maklumat yang berkenaan dengan pemegang lesen atau mana-mana orang lain di bawah Akta ini dan hendaklah diberi capaian kepada apa-apa maklumat sama ada disimpan dalam suatu komputer atau selainnya.

(2) Mana-mana pegawai yang diberi kuasa oleh Suruhanjaya di bawah subseksyen (1), hendaklah mempunyai kuasa untuk menghendaki pengemukaan rekod, akaun, data, data berkomputer dan dokumen yang disimpan oleh pemegang lesen atau mana-mana orang lain dan untuk memeriksa, meneliti dan memuat turun daripadanya, membuat salinannya atau mengambil cabutan daripadanya.

(3) Bagi maksud seksyen ini, “capaian” termasuklah diberi kata laluan, kod penyulitan, kod penyahsulitan, perisian atau perkakasan yang perlu dan apa-apa cara lain yang dikehendaki untuk membolehkan data berkomputer difahami.

(4) Mana-mana orang yang enggan memberikan apa-apa maklumat yang dengan munasabahnya mungkin dikehendaki daripadanya di bawah subseksyen (1) dan yang ada dalam pengetahuannya atau dalam kuasanya untuk memberikan melakukan suatu kesalahan dan boleh, apabila disabitkan, didenda tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya.”.

Pindaan seksyen 53

40. Seksyen 53 Akta ibu dipinda—

(a) dalam subseksyen (1)—

- (i) dalam perenggan (i), dengan memotong perkataan “bentuk dan kandungan lesen dan syarat-syarat yang hendak ditetapkan,” dan perkataan “lesen dan”;
- (ii) dalam perenggan (l), dengan menggantikan perkataan “kontraktor pendawaian” dengan perkataan “unit pendawaian persendirian, kontraktor elektrik, kontraktor perkhidmatan elektrik, kontraktor pembaikan elektrik”;
- (iii) dalam perenggan (xa), dengan memotong perkataan “dan” di hujung perenggan itu; dan

- (iv) dengan memasukkan selepas perenggan (xa) perenggan yang berikut:
- “(xb) standard, spesifikasi, amalan dan langkah yang hendak digunakan dan apa-apa perkara lain yang berhubungan dengan kualiti kuasa;
 - (xc) perkara yang berhubungan dengan pemetaran, pemetaran prabayar, infrastruktur pemetaran, telepemetaran, kelengkapan, produk elektrik dan kelengkapan elektrik pengguna;
 - (xd) perkara yang berhubungan dengan penggunaan talian bekalan bagi maksud komunikasi sebagaimana yang dinyatakan di bawah seksyen 44A;
 - (xe) berkenaan dengan import dan pengilangan kelengkapan elektrik pengguna, pendaftaran pengimport dan pengilang dan badan penilaian pematuhan yang berkenaan dengan kelengkapan elektrik pengguna, pusat latihan dan pemeriksaan atau institusi dan menetapkan apa-apa fi pendaftaran;
 - (xf) perkara yang berhubungan dengan Kumpulan Wang Industri Elektrik;
 - (xg) perkara yang berhubungan dengan pelesenan di bawah Akta;
 - (xh) semua fungsi, kewajipan dan tanggungjawab Pengendali Sistem dan Pembeli Tunggal;
 - (xi) semakan pelan pengurusan keselamatan dan program pengurusan keselamatan dan bagi audit pemegang lesen dan pemunya atau pengendali pemasangan elektrik bukan domestik;

(xj) fi yang kena dibayar berkeenaan dengan penggunaan elektrik dengan cekap oleh kelengkapan dan kelulusannya;

(xk) perkara yang berhubungan dengan pendaftaran orang yang menyediakan perkhidmatan yang berhubungan dengan penggunaan elektrik dengan cekap dan pembayaran fi bagi memproses permohonan dan pendaftaran;

(xl) perkara dan tempoh masa penyimpanan rekod dan dokumen; dan”; dan

(b) dalam subsekyen (2)—

(i) dengan menggantikan perkataan “lima ribu” dengan perkataan “dua puluh ribu”; dan

(ii) dengan menggantikan perkataan “satu tahun” dengan perkataan “dua tahun”.

Pindaan seksyen 54

41. Seksyen 54 Akta ibu dipinda—

(a) dengan menomborkan semula seksyen yang sedia ada sebagai subseksyen (1) seksyen itu;

(b) dalam subseksyen (1)—

(i) dengan memasukkan selepas perkataan “boleh” perkataan “, atas syor Suruhanjaya,”;

(ii) dengan memasukkan selepas perkataan “atau mana-mana peraturan” perkataan “atau kod”;

(iii) dengan memasukkan selepas perkataan “di bawahnya” perkataan “bagi apa-apa tempoh sebagaimana yang dinyatakan”;

(c) dalam perenggan (a), dengan memasukkan selepas perkataan “pihak berkuasa bekalan” perkataan “atau pemegang lesen;”; dan

(d) dengan memasukkan selepas subseksyen (1) subseksyen yang berikut:

“(2) Suruhanjaya boleh mengesyorkan kepada Menteri syarat yang boleh terpakai bagi suatu pengecualian yang diberikan di bawah subseksyen (1).

(3) Kecuali diperuntukkan selainnya dalam pengecualian itu, suatu pengecualian di bawah subseksyen (1) boleh diubah atau dibatalkan.”.

Kecualian dan peralihan

42. (1) Apa-apa pendaftaran, lesen, perbuatan, perintah, arahan, kelulusan atau keputusan yang dilakukan, dibuat atau diberikan sebelum tarikh permulaan kuat kuasa Akta ini hendaklah disifatkan telah dilakukan, dibuat atau diberikan di bawah Akta ini dan hendaklah terus berkuat kuasa dan berkesan sepenuhnya berhubung dengan orang yang baginya ia terpakai sehingga dibatalkan atau dipinda.

(2) Apa-apa tindakan atau prosiding yang bermula atau belum selesai sebaik sebelum tarikh permulaan kuat kuasa Akta ini hendaklah, selepas tarikh permulaan kuat kuasa Akta ini, diteruskan seolah-olah Akta ibu tidak dipinda oleh Akta ini.

(3) Jika pada tarikh permulaan kuat kuasa Akta ini permohonan bagi pendaftaran pemasangan di bawah seksyen 21 Akta ibu masih belum selesai di pihak Suruhanjaya, peruntukan Akta ibu yang berhubungan dengan pendaftaran pemasangan sebagaimana yang dipinda oleh Akta ini hendaklah terpakai.

(4) Jika pada tarikh permulaan kuat kuasa Akta ini permintaan untuk bekalan elektrik yang masih belum selesai di pihak pemegang lesen, peruntukan Akta ibu yang berhubungan dengan kecualian kepada kewajipan membekalkan elektrik sebagaimana yang dipinda oleh Akta ini hendaklah terpakai.

(5) Jika pada tarikh permulaan kuat kuasa Akta ini perjanjian khas di bawah seksyen 29 Akta ibu antara pemegang lesen dengan mana-mana orang yang sedang dirundingi, peruntukan Akta ibu yang berhubungan dengan perjanjian khas mengenai bekalan sebagaimana yang dipinda oleh Akta ini hendaklah terpakai.

(6) Suatu premis komersial atau perindustrian yang belum diluluskan menurut atau melanggar dengan Akta Kerajaan Tempatan 1976 dan Akta Perancangan Bandar dan Desa 1976 pada tarikh permulaan kuat kuasa Akta ini hendaklah terhenti mendapat bekalan elektrik apabila tamat tempoh dua puluh empat bulan dari tarikh permulaan kuat kuasa Akta ini melainkan jika premis komersial atau perindustrian itu telah diluluskan menurut atau tidak melanggar dengan Akta Kerajaan Tempatan 1976 dan Akta Perancangan Bandar dan Desa 1976.

(7) Jika suatu pertikaian di bawah seksyen 9E, 17, 24, 25, 26, 27, 28, 28A, 29 dan 32 Akta ibu timbul sebelum permulaan kuat kuasa Akta ini, peruntukan Akta ibu yang terpakai bagi penentuan pertikaian sebagaimana yang dipinda oleh Akta ini hendaklah terpakai.

(8) Jika apa-apa kemalangan atau kebakaran yang menyebabkan atau mengakibatkan kehilangan nyawa atau kecederaan kepada mana-mana orang atau kerosakan serius pada harta telah berlaku sebelum tarikh permulaan kuat kuasa Akta ini dan pegawai diberi kuasa itu belum mengemukakan laporannya mengenai kemalangan atau kebakaran itu, peruntukan Akta ibu yang terpakai bagi pemberitahuan kemalangan atau kebakaran sebagaimana yang dipinda oleh Akta ini hendaklah terpakai.

(9) Mana-mana orang yang memberikan apa-apa perkhidmatan yang berhubungan dengan penggunaan elektrik dengan cekap sebelum tarikh permulaan kuat kuasa Akta ini, hendaklah mendaftar dengan Suruhanjaya dalam masa dua belas bulan dari tarikh permulaan kuat kuasa Akta ini.

HURAIAN

Rang Undang-Undang ini bertujuan untuk meminda Akta Bekalan Elektrik 1990 ("Akta 447") terutamanya untuk menambah baik aktiviti pelesenan bekalan elektrik dan kelakuan pemegang lesen, meningkatkan kualiti perkhidmatan oleh pemegang lesen terhadap pengguna, menstabilkan mekanisma pengawalseliaan dan penguatkuasaan termasuk mengetatkan langkah-langkah pencegahan bagi membanteras pencurian elektrik, membolehkan penggunaan teknologi komunikasi yang terkini, pemeteran elektrik yang canggih dan untuk meningkatkan keselamatan pemasangan dan kelengkapan elektrik.

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.
3. *Fasal 2* bertujuan untuk membuat pindaan am kepada Akta 447 dengan menggantikan perkataan “adalah melakukan” dengan perkataan “melakukan”.
4. *Fasal 3* bertujuan untuk meminda seksyen 2 Akta 447 untuk memasukkan takrif baru dan meminda takrif yang sedia ada dalam Akta 447. Antara takrif baru yang dimasukkan ialah—
 - (a) “komunikasi” merujuk kepada talian bekalan elektrik yang boleh digunakan bagi maksud komunikasi. Ini untuk membenarkan talian bekalan elektrik digunakan bagi maksud komunikasi sebagai contoh Jalur Lebar pada Talian Kuasa (BPL) atau Komunikasi Talian Kuasa (PLC). Pada masa ini Akta ini melarang talian bekalan elektrik daripada digunakan bagi isyarat atau komunikasi;
 - (b) “mengasingkan” merujuk kepada pengasingan kedudukan dan fungsi Pengendali Sistem dan Pembeli Tunggal daripada pemegang lesen bagi persaingan dan ketelusan yang berkesan. Ini bagi memastikan bahawa Pembeli Tunggal dan Pengendali Sistem bertindak secara bebas;
 - (c) “Pembeli Tunggal” merujuk kepada mana-mana orang atau sesuatu unit, jabatan atau bahagian yang membentuk sebahagian daripada pemegang lesen yang diberi kuasa di bawah subseksyen baru 22B(1) yang dicadangkan yang bertanggungjawab bagi pengurusan pemerolehan elektrik dan perkhidmatan yang berkaitan, yang termasuklah perancangan, penjadualan, pemerolehan dan penyelesaian, dan apa-apa fungsi lain sebagaimana yang ditetapkan. Ini bagi memastikan bahawa fungsi Pembeli Tunggal bebas daripada mana-mana aktiviti di bawah lesen pemegang lesen; dan
 - (d) “Pengendali Sistem” merujuk kepada orang yang diberi kuasa atau entiti suatu pemegang lesen yang bertanggungjawab bagi pengendalian, penghantaran elektrik dan pengawalan sistem kuasa untuk diasingkan daripada apa-apa aktiviti pemegang lesen. Ini bagi memastikan bahawa fungsi Pengendali Sistem bebas daripada mana-mana aktiviti di bawah lesen pemegang lesen.
5. *Fasal 4* bertujuan untuk meminda seksyen 4 Akta 447 untuk memperuntukkan fungsi dan kewajipan Suruhanjaya yang lebih menyeluruh dan berkesan untuk memenuhi keperluan isu-isu dan cabaran semasa dan masa hadapan industri pembekalan elektrik.
6. *Fasal 5* bertujuan untuk menggantikan seksyen 4A Akta 447 bagi memperjelas skop kuasa pegawai diberi kuasa Suruhanjaya selaras dengan perundangan sedia ada.
7. *Fasal 6* bertujuan untuk memasukkan seksyen baru 5A dan 5B ke dalam Akta 447 untuk memberi Suruhanjaya kuasa untuk mendapatkan kembali kos memegang kelengkapan, alat, bahan, buku, rekod, akaun, dokumen, barang atau benda yang disita daripada orang yang didapati melakukan kesalahan dan melepaskan kelengkapan, alat, bahan, buku, rekod, akaun, dokumen, barang atau benda yang disita jika tidak dikehendaki dalam prosiding.

8. *Fasal 7* bertujuan untuk memotong seksyen 7 Akta 447.
9. *Fasal 8* bertujuan untuk meminda seksyen 8 Akta 447 untuk menjadikan suatu kesalahan bagi keengganan untuk memberikan maklumat kepada mana-mana pegawai Suruhanjaya dalam menjalankan fungsi, tugas dan kuasa di bawah seksyen 4 Akta 447 dan untuk menaikkan penalti kerana menghalang pegawai yang diberi kuasa menjalankan tugas bagi pencegahan dan pematuhan yang lebih baik.
10. *Fasal 9* bertujuan untuk meminda subseksyen 9(1) Akta 447 untuk membolehkan terma dan syarat lesen ditetapkan dan untuk memasukkan subseksyen baru (2B), (2C) dan (7) ke dalam seksyen 9 Akta 447 untuk memberi Suruhanjaya kuasa untuk melesenkan orang mengikut aktiviti pembekalan elektrik supaya aktiviti yang dilesenkan dipisahkan daripada aktiviti lain pemegang lesen, untuk membolehkan Suruhanjaya mengeluarkan lesen untuk pemasangan awam atau persendirian dengan kapasiti di bawah 30 megawatt yang mana kerap diperbaharui atau untuk suatu jangka masa yang pendek dan disambungkan kepada grid pengagihan yang tidak mempunyai kesan yang signifikan kepada sistem grid kebangsaan, untuk membolehkan Suruhanjaya untuk mengeluarkan kod, garis panduan atau arahan berkenaan dengan apa-apa pemasangan dan, dengan kelulusan Menteri, untuk mengenakan terma atau syarat tambahan ke atas lesen dan untuk meminda apa-apa terma atau syarat sesuatu lesen.
11. *Fasal 10* bertujuan untuk memasukkan seksyen baru 9A, 9B, 9C, 9D dan 9E ke dalam Akta 447 untuk menghendaki pemegang lesen mengemukakan pelan perniagaan bagi tadbir urus dan pengawalseliaan yang lebih baik, untuk membolehkan Suruhanjaya mengeluarkan arahan ke atas pemegang lesen untuk memastikan pematuhan yang ketat, untuk membolehkan pemakaian standard prestasi pembekalan dan perkhidmatan oleh pemegang lesen, untuk meningkatkan kualiti pembekalan dan perkhidmatan kepada pengguna, untuk menghendaki pemegang lesen supaya mewujudkan standard pengguna bagi memenuhi permintaan pengguna, pengendalian aduan, perlindungan maklumat pengguna, maklumat mengenai tarif, pengebilan, dsb., untuk membolehkan Suruhanjaya mengarahkan pemegang lesen untuk memberi maklumat mengenai tahap prestasi yang dicapai, untuk menghendaki pemegang lesen untuk menyimpan dan menyenggara akaun aktiviti tahunan yang sepatutnya di bawah lesen dan untuk memberi Suruhanjaya kuasa untuk meluluskan terma dan syarat dalam mana-mana perkiraan oleh pemegang lesen atau Pembeli Tunggal bagi perolehan elektrik.
12. *Fasal 11* bertujuan untuk meminda seksyen 12 Akta 447 dengan menggantikan keseluruhan subseksyen (1) untuk menjadikan peruntukan itu lebih jelas.
13. *Fasal 12* bertujuan untuk meminda seksyen 17 Akta 447 bagi membetulkan kerosakan oleh pemegang lesen dan untuk memastikan keberterusan pembekalan elektrik dalam tempoh yang ditetapkan dan bagi pemegang lesen untuk membaiki apa-apa kerosakan dan untuk membayar pampasan bagi apa-apa kerosakan sebagaimana yang diarahkan oleh Suruhanjaya jika ditunjukkan bahawa kerosakan itu adalah akibat daripada perbuatan cuai pemegang lesen.
14. *Fasal 13* bertujuan untuk meminda seksyen 21 Akta 447 bagi menjelaskan peruntukan sedia ada dan untuk mengecualikan kehendak bagi pendaftaran suatu pemasangan yang telah dikecualikan di bawah subseksyen 21(1).

15. *Fasal 14* bertujuan untuk memasukkan seksyen baru 22A dan 22B ke dalam Akta 447 untuk memperuntukkan bagi suatu Pengendali Sistem dan Pembeli Tunggal bagi maksud memastikan pengendalian sistem kuasa yang telus dan tidak berdiskriminasi dan yang tanggungjawabnya diasingkan daripada aktiviti di bawah lesen pemegang lesen.

16. *Fasal 15* bertujuan untuk memasukkan seksyen baru 23D ke dalam Akta 447 untuk menghendaki pendaftaran mana-mana orang yang memberikan perkhidmatan yang berhubungan dengan penggunaan elektrik dengan cekap.

17. *Fasal 16* bertujuan untuk memasukkan kesalahan baru di bawah subseksyen baru 24(6) Akta 447 untuk memastikan bahawa pemegang lesen menunaikan obligasi statutorinya untuk memberikan bekalan elektrik atau untuk menjalankan kuasanya dengan sah untuk memotong bekalan elektrik, tanpa halangan atau gangguan.

18. *Fasal 17* bertujuan untuk meminda seksyen 25 Akta 447 bagi menjelaskan hal keadaan yang pemegang lesen boleh dikecualikan daripada memberikan bekalan elektrik.

19. *Fasal 18* bertujuan untuk menggantikan seksyen 26 Akta 447 bagi melibatkan Suruhanjaya dalam menetapkan tarif dan caj bagi memastikan pembekalan elektrik pada harga yang munasabah.

20. *Fasal 19* bertujuan untuk meminda seksyen 27 Akta 447 bagi menambah baik kualiti pembekalan dan perkhidmatan kepada pengguna dengan memastikan bahawa pemegang lesen itu hanya boleh mengenakan perbelanjaan penyambungan yang diluluskan.

21. *Fasal 20* bertujuan untuk memasukkan seksyen baru 28B ke dalam Akta 447 untuk memastikan bahawa pemegang lesen dan pengguna membuat perjanjian pembekalan elektrik yang diluluskan mengikut Akta.

22. *Fasal 21* bertujuan untuk meminda seksyen 29 Akta 447 untuk menambah baik kualiti pembekalan dan perkhidmatan oleh pemegang lesen kepada pengguna di bawah perjanjian khas yang diluluskan mengikut Akta.

23. *Fasal 22* bertujuan untuk meminda seksyen 30 Akta 447 untuk membolehkan Suruhanjaya menyelesaikan pertikaian di bawah Akta dengan lebih baik.

24. *Fasal 23* bertujuan untuk memasukkan seksyen baru 30A dan 30B ke dalam Akta 447 untuk menghendaki pertikaian diberitahu secara bertulis kepada Suruhanjaya bahawa pihak-pihak kepada pertikaian itu tidak dapat menyelesaikan pertikaian itu melalui perundingan dan untuk memenuhi kehendak yang ditetapkan. Seksyen baru ini juga bagi memperuntukkan bahawa keputusan Suruhanjaya adalah mengikat dan boleh dikuatkuasakan dan bagi suatu daftar keputusan disenggarakan oleh Suruhanjaya.

25. *Fasal 24* bertujuan untuk meminda seksyen 32 Akta 447 untuk menambah baik peruntukan mengenai pemeteran bekalan elektrik oleh pemegang lesen dan untuk membenarkan penggunaan meter prabayar, infrastruktur pemeteran atau telepemeteran dan untuk meter dipasang, ditentu ukur, diuji, ditentusahkan dan disenggarakan mengikut mana-mana peraturan, kod atau garis panduan yang dibuat atau dikeluarkan di bawah Akta ini.

26. *Fasal 25* bertujuan untuk meminda nota bahu kepada seksyen 33 Akta 447 bagi maksud menjelaskan dan menggantikan perkataan Pengerusi dengan Ketua Pegawai Eksekutif selaras dengan Akta Suruhanjaya Tenaga 2001 [Akta 610].

27. *Fasal 26* bertujuan untuk memasukkan Bahagian baru VIIA dan seksyen baru 33A hingga 33F ke dalam Akta 447 untuk menambah baik keselamatan pemasangan dan kelengkapan dan untuk membolehkan Suruhanjaya memastikan dengan lebih baik pematuhan yang lebih ketat kepada kehendak keselamatan oleh pemegang lesen, pemunya atau pengendali pemasangan elektrik bukan domestik, pemegang lesen bagi jualan, pemegang lesen bagi pemasangan persendirian dan orang yang tertakluk kepada Akta.

28. *Fasal 27* bertujuan untuk meminda seksyen 36 Akta 447 untuk membolehkan pertikaian di bawah seksyen 30 atau perkara lain diselesaikan melalui timbang tara.

29. *Fasal 28* bertujuan untuk meminda subseksyen 37(1), (2), (3), (4), (10), (12), (14), (15) dan (16) Akta 447 untuk menaikkan hukuman bagi kesalahan mengganggu atau melaraskan apa-apa pemasangan sedemikian sehingga menyebabkan atau berkemungkinan menyebabkan bahaya kepada nyawa atau anggota badan manusia atau kecederaan atau kepada apa-apa kelengkapan atau harta lain, perbuatan gopoh atau cuai atau peninggalan yang menyebabkan kerosakan kepada orang atau harta berkenaan dengan apa-apa pemasangan atau kelengkapan, pencurian elektrik termasuk mengganggu meter dan peruntukan bagi kesalahan berulang yang dengannya hukuman yang berbeza diperuntukkan bagi pengguna domestik dan pengguna bukan domestik, melekatkan poster atau mencatatkan struktur pemasangan awam, merosakkan mana-mana meter atau alat lain yang digunakan atau yang berkaitan dengan apa-apa pemasangan berlesen bagi merekodkan pengeluaran atau penggunaan elektrik.

Pindaan ini juga bertujuan untuk menaikkan hukuman bagi kesalahan terhadap Akta yang tiada penalti diperuntukkan dengan nyata dan juga untuk memasukkan perenggan baru 37(15)(b) ke dalam Akta 447 untuk memperuntukkan bagi kesalahan dan hukuman terhadap mana-mana orang yang melalui apa-apa perbuatan atau peninggalan melanggar mana-mana peruntukan di bawah Akta. Sebagai tambahan, subseksyen 37(16) Akta 447 digantikan untuk memperuntukkan takrif “pengguna domestik”, “pengguna bukan domestik” dan “pemasangan domestik” bagi maksud subseksyen 37(3) Akta 447.

30. *Fasal 29* bertujuan untuk memasukkan seksyen baru 37A dan 37B ke dalam Akta 447 bagi kesalahan yang dilakukan oleh pertubuhan perbadanan dan kesalahan kerana mencuba dan bersubahat untuk melakukan kesalahan.

31. *Fasal 30* bertujuan untuk meminda seksyen 38 Akta 447 untuk memastikan bahawa hanya dalam kes kecurian elektrik yang jelas dan terbukti di bawah Akta sahaja yang membolehkan seorang pemegang lesen memotong bekalan kepada pengguna. Suruhanjaya juga boleh menentusahkan sama ada kesalahan itu telah dilakukan dan jika kesalahan itu tidak dilakukan, Suruhanjaya boleh mengarahkan penyambungan semula bekalan elektrik oleh pemegang lesen. Pemegang lesen juga hendaklah membuktikan bahawa mereka telah mengalami kerugian dan perbelanjaan yang munasabah sebelum pemegang lesen boleh

menuntut terhadap pengguna yang berkenaan dan pemegang lesen hanya boleh mendapatkan kembali kerugian atau perbelanjaan itu melalui tindakan mahkamah dan bukan melalui pemotongan bekalan elektrik dan pemegang lesen hanya boleh menuntut bagi kerugian hasil dan perbelanjaan bagi tempoh enam bulan sahaja melainkan jika ia suatu tuntutan di mahkamah.

32. *Fasal 31* bertujuan menggantikan seksyen 43 Akta 447 untuk memberi Menteri kuasa dengan keizinan Pendakwa Raya untuk menetapkan apa-apa kesalahan di bawah Akta yang boleh dikompaunkan dan juga kriteria bagi pengkompaunan kesalahan itu. Suruhanjaya melaksanakan pengkompaunan kesalahan itu dengan keizinan daripada Pendakwa Raya.

33. *Fasal 32* bertujuan untuk memasukkan seksyen baru 44A ke dalam Akta 447 untuk membenarkan komunikasi di bawah Akta Komunikasi dan Multimedia 1998 [Akta 588] dengan menggunakan rangkaian dan infrastruktur bekalan elektrik pemegang lesen. Ia juga membolehkan peraturan-peraturan, kod, garis panduan dan arahan dibuat oleh Suruhanjaya untuk mengawal selia aktiviti dan pihak yang berkenaan.

34. *Fasal 33* bertujuan untuk memasukkan Bahagian baru IXA dan seksyen baru 44B hingga 44E ke dalam Akta 447 untuk membolehkan sumbangan oleh pemegang lesen ke dan bagi penubuhan Kumpulan Wang Industri Elektrik dan untuk memberi Suruhanjaya kuasa untuk menguruskan, mengendalikan dan membelanjakan dana tersebut.

35. *Fasal 34* bertujuan untuk meminda subseksyen 45(1) Akta 447 supaya selaras dengan pindaan yang berhubungan dengan komunikasi yang menggunakan rangkaian dan infrastruktur bekalan elektrik pemegang lesen supaya seiring dengan perkembangan teknologi dan komunikasi.

36. *Fasal 35* bertujuan untuk memasukkan seksyen baru 45A, 45B dan 45C ke dalam Akta 447 untuk meningkatkan tadbir urus, kecekapan dan daya saing dalam industri bekalan elektrik melalui pengauditan pemegang lesen dan pemunya atau pengendali pemasangan elektrik bukan domestik. Pindaan ini juga membolehkan Suruhanjaya menentukan standard yang boleh terpakai bagi apa-apa pemasangan atau kelengkapan dan bagi pemegang lesen, pemunya atau pengendali pemasangan elektrik bukan domestik, pengilang, pengimport dan kontraktor elektrik berdaftar untuk memegang simpan dan menyimpan rekod dan dokumen berkenaan dengan perkara dan bagi tempoh masa yang ditetapkan di bawah Akta 447.

37. *Fasal 36* bertujuan untuk meminda seksyen 46 Akta 447 untuk memasukkan penggunaan talian bekalan elektrik bagi infrastruktur pemeteran, telepemeteran dan bagi komunikasi yang tidak mengganggu talian pengisyaratan Kerajaan.

38. *Fasal 37* bertujuan untuk meminda seksyen 48 Akta 447 untuk membolehkan kod dikeluarkan oleh Suruhanjaya berkenaan dengan sekatan penyambungan ke bumi.

39. *Fasal 38* bertujuan untuk memasukkan seksyen baru 50A, 50B, 50C, 50D, 50E dan 50F ke dalam Akta 447 berkenaan dengan pembangunan dan pematuhan kepada kod yang mengandungi suatu set kaedah-kaedah, prinsip

dan tatacara yang dikeluarkan oleh Suruhanjaya dengan kelulusan Menteri, termasuk kod keselamatan infrastruktur elektrik, kod keselamatan pemasangan elektrik bukan domestik dan kod lain dan untuk membenarkan Suruhanjaya memegang simpan dokumen itu. Pindaan ini juga bertujuan untuk membolehkan Suruhanjaya mengeluarkan garis panduan atau arahan bagi pematuhan yang lebih ketat, untuk mengubah, mengkaji semula atau membatalkan sesuatu kod, garis panduan atau arahan, kesalahan bagi ketidakpatuhan terhadap mana-mana kod, garis panduan atau arahan dan daftar kod, garis panduan atau arahan.

40. *Fasal 39* bertujuan untuk memasukkan seksyen baru 52A dan 52B ke dalam Akta 447 berkenaan dengan jaminan maklumat infrastruktur bekalan oleh pemegang lesen supaya selaras dengan jaminan siber dan untuk membolehkan Suruhanjaya mendapatkan maklumat dan capaian kepada data berkenaan dengan pemegang lesen atau mana-mana orang di bawah Akta ini termasuk kuasa untuk menghendaki pengemukaan rekod, akaun data, data berkomputer yang disimpan oleh pemegang lesen atau mana-mana orang dan pemasangan suatu kesalahan dan hukuman baharu bagi ketidakpatuhan.

41. *Fasal 40* bertujuan untuk meminda seksyen 53 Akta 447 untuk meluaskan skop bagi Menteri untuk membuat peraturan-peraturan di bawah Akta 447 termasuk perkara di bawah pindaan yang dicadangkan.

42. *Fasal 41* bertujuan untuk meminda seksyen 54 Akta 447 untuk meluaskan kuasa yang Menteri boleh memberi pengecualian daripada peruntukan Akta, peraturan-peraturan atau kod atas syor Suruhanjaya. Suruhanjaya juga boleh mengesyorkan kepada Menteri syarat yang terpakai bagi sesuatu pengecualian dan apa-apa pengecualian boleh diubah atau dibatalkan.

43. *Fasal 42* memperuntukkan bagi peruntukan kecualian dan peralihan.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya tidak dapat ditentukan sekarang ini.

[PN(U2)2808]